



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 9

Nashi ayoktsü nokdangba ozüng pelaa agizüker: Maneka Gandhi

TAPAK 8

Ariana Grande-i Charity Concert ka ayonga akatsü asoshi sentong lir



VOL. XIV NO. 219 (ADOK 219)

DIMAPUR

SUNDAY

MAY 28, 2017

5.00

## Lokayukta Bill 2015 mapang agitsü

**Kohima, May 27:** Bilema aliba ama "Nagaland Lokayukta Bill, 2015" atema Select Committee-i parnok nem ano ita trok agütsüsemang ta mapang meshilokogo.

Honibarnü 12 buba Nagaland Legislative Assembly (NLA) nung 16 buba Special Session alidang Committee Chairman aser Parliamentary Secretary, Er Levi Rengma-i, "Nagaland Lokayukta Bill, 2015 indang Select Committee indang kümsük nung ano ita trok agütsüsemang" ta ashi. Paise, ita trok tsüingda report agütsü ta shisem.


Committee-i mapang talila meshilokba tan agi joko

asembenbuba asütsü. July 2016 nung Assembly session aser ano November 22, 2016 nü session nung parnoki ita trokrok meshiloka liasü.

Lokayukta ya state maparen nung ochimashi anema ketdangsütsü indang lir. Lokayukta-i ochimashi aser sorkar mapa inyakertemi mapa shitak meinyakba ken o tem bushisüingdangtsü aser public indang khurettem reprangtsü atema lir.

India kübok state balala nung Lokayukta tenteta lir. Ajisiüaka, Nagaland nungbo iba Bill ya kanga karabo magizüktetsü ama ajiteter.

## Nagaland Assembly-i GST Bill agizükogo; Nübertem dang mepishir



Chief Minister, Dr. Shurhozelie-i May 27, 2017 nü Nagaland tatar senden nung GST dak aketba ken o benokba noksa nung angur. (DIPR)

**Kohima, May 27 (TYO):** Honibarnü Nagaland State Assembly indang Special Session nung Goods and Services Tax (GST) Bill agizükogo.

Chief Minister Dr. Shurhozelie Liezeitsu-i Finance portfolio bona lir aser tanep pai assembly nung GST bill benok aser züingsemtemi voice vote ajanga agizüka ayu.

Bill agizüka mayudang olemtepba mapang ka agi aser idangji Roads & Bridges Minister, Y Vikheho Swu-i ashiba agi, "Nagaland nung GST benokba ajanga tajanzük aika angutsü. GST ajanga trade & industry aser talirtem atema tajanzük agütsütsü aser state sorkari saru teimba

angutsü." GST indang inyakyim tasen ya shishilembartem aser public-i metettsüla aser inyakyim sülen anidaksüla. GST goods & services indang sen agütsüba ajak zülüoka ayutsü aser tsüingsü bushitettsü. Original producer nungi retailer jenjang tashi nung osang metettsü, ta Vikheho Swu-isa ashi.

Nagaland nung internet connectivity junga mali aser iba khuret atema Centre sorkari North east atema balaka 100 mbps satellite link ka yanglutsü. Iba ajanga meta talang pilar aliba tesemtem nunga telecommunications tajungba

akümsü, ta paise shisem.

School Education & SCERT Minister, Yitachu-ia ashiba agi, GST ajanga state senpongi saru shitak angutsü, kechiyong iba ya ajanga saru aika saruba ka kümdaktsür.

"Ajisiüaka, Nagaland nung non-local shishilembartem, talisa Dimapur nung parnok indang shishilembabaji STs aser SCs tenüngtem nung zülüoka lir. Parnoki saru magütsütsü atema iba amai inyaker saka iba ya ozüing alema inyakba mapa ka lir. GST inyaksangshi ajanga iba ozüing alema inyakba mapa agientsü imlar" ta Yitachu-isa ashi.

(Maneni tapak 12 nung...)

## Nagaland Assembly anentsü mulunga lir TELOK KADEN JEMBIBA AJANGA TELEMTETBA MAGITETTSÜ: CM

**Kohima, May 27 (TYO):** Naga yimten tebilemsü atema olemtep agiba ajanga ajaki agizüksüsa aser mulungsüsa telemtetba ka agira parnoki menden toktsütsü ta züingsem 60 agi akümba Nagaland State Assembly (NLA)-i tanü nenshia metetdaksüogo.

Honibarnü Special Session alidang, Assembly züingsemtemisa Centre dang küm 20 jungnüa yimtem tebilemsü atema olemtep agiyonga aruba tekaratiba nung telemtetba ka agitsü aser kokra, 2018 küm Assembly election matongdang lemtettsü atema tayongzükba agütsü.

Naga yimten tebilemsü ya mapang talangka metembangteti

arur aser iba tebilemsü atema Centre o NSCN(IM) na olemtep tenzükera joko küm 21 ajunger, ta Advisor to Chief Minister, MLA Dr T M Lotha-i ashi.

Olemtep liyonga arudang telok ana tsüingda August 3, 2015 nü Framework Agreement ka agiogo aser joko olemtep tatembangleni arudar. Ajisiüaka, Naga nung melongjemba agi, telok ana tsüingda telemtetba ka agitsü atema tetsükdaktsü ajurur. Yimten tebilemsü koktettsü atema Naga nung tema aser telung nung alirtem ajak longjemtsüla, ta Dr T M Lotha-i ayongzük.

(Maneni tapak 11 nung...)

## Gari lendong nung nisung ka asü

**Dimapur, May 27 (TYO):** Honibar nikongdang 3:30 ako meta Kukidolong apu anasa Bolero gari ka Chathe ayongi longoka ai aser iba lendong nung nisung ka asü aser ana yiruogo.

Gari nungji nisung asem mena lia lendongji ajuru aser par asemprong

yirur Zion Hospital-i anir ao, saka Notoka N Chishi (20) ta ser nisung ka asü, ta osang angazüker.

Tanüngba nisung anaji mozükidang anepaludar. Iba osang zülü tashi nung gari lendong atalokba osang tejangja menguteti liasü.

## DUCCF-i telungpur atema saru mesarutsü

**Dimapur, May 27 (TYO):** Dimapur Urban Councils Chairmen Federation (DUCCF)-i sangdong ka nung Naga National Movement akhümsübur aser maneni Naga linük longjemtsü asoshi mapa inyaksü, ta metetdaksü.

Ajisiüaka, Naga yimten asoshi inyakba maparen nung telongjem mali tashi, Naga nung taginüba metongtetsü ta October 31, 2013 nü Naga nungertemi angateta, 'Sorkar Ka, Saru Ka' yimyim ayimoktsü. Iba nung ajemdaker, DUCCF-i Naga Yimten telok shinga atema saru mesarutsü lemtetoogo, ta Media Cell, DUCCF sangdong nung shia lir.

ACAUT kübok October 31, 2013 nü Public Rally nung Naga

nungertemi lemtetba nung ajemdaker DUCCF-i iba telemtetba bangzünga renem. Dimapur kübok kiyong balala nung nübertem tenzüktsü aser parnok taginüba atema inyaksü asoshi Colony Council tem tenteta lir.

Naga nungertemi aginüba anema onoki mapa meinyaktsü aser Naga public-i, 'Sorkar Ka, Saru Ka' ta bangzünga renema aliba anema council temi saru mesarutsü. Anungji, Naga Yimten Teloktemi sen saruba shiditem magütsütsü mesüra Chairman o Council züingsemtem dang sen sarutsü atema tetuyuba magütsütsü metetdaksür, ta Media Cell, DUCCF sangdong nungsa metetdaksü.

## Ao Laishirtemi yimten aser Arogo nung Ochishia inyaksü indang jembir CLEAN ELECTION ATEMA LAISHIRTEMI TEMULUNG AGÜTSÜTSÜLA

**Longmisa, May 27 (TYO):** Tanü Laishirtem ya loktiliba nung temelenshi tajung bener arur telok ka asütsüla, kechiyong laishirtem ya nübertem teimla samar alidak teimla tasen bener arutsürtem lir ta Parliamentary Secretary, S.Chuba Longkumeri metetdaksü.

Pai iba o ya tanü Honibar nü Longmisa yimtak Ao Theological Association inti mungdang nung tayongzükba o jembidang metetdaksü.

Paise laishirtem dang Nagaland nung election timi agitetsü asoshi akok tashi shilem agitsü mepishia metetdaksü. "Clean Election mapa ya takok ngua inyaksü asoshi laishirtemi temulung agütsütsüla," ta paise ayongzük.

Election ajanga asen lima

raksaba meyaglüteti alidang küm pongo süir aser tanaben election mapang atonger. Iba teraksa yanglushitsü asoshi talisa Ao kin tebilemsü tulu lir, anungji laishirtemi putu menden nung yimsüsürtem den longjemer tang tashi nung tim mesüi agiba election maparen ajak metongshia inyaksüla ta Wb.S.Chuba Longkumerisa metetdaksü.

Paise Longmisa Arogo aser yimteni iba ama laishir mungdang agizüka mongdaksüba asoshi pelaba metetdaksü.

Tanü mezüng senden nung mungdang onük 'Loktilibaliro aser arogo nung Ochi Kuliser Takim' ta asüba nung ajemdaker Rev.Dr.Takatemjen aser Dr.P.Kilemsüingla nati jembia liasü.

Kasa onük nung Rev. Dr. Takatemjen-i jembidang, loktiliba nung (public life) kulistir kati light bill shidak agütsütsüla, shishilembaba nung ochi shia inyaksüla aser election mapang vote shitak agütsütsüla ta shia liasü.

"Tanü lokti nung tiyazü agi sünga inyakba teraji maparen ajak nung ochimashi kanga inyaker aser iba jagi lanurtem aika mapa mangu kangshiteper, anungji item timtem nungi nübertem anitetsü asoshi nübertem ola adoktsüla, osangkaket balala nung oset zülutsüla aser school text book aser Sunday school syllabus nung moral education inoka sayutsüla," ta paise metetdaksü.

(Maneni tapak 12 nung...)

## Kashmir nung Wani melenzük Sabzar Bhat tepsetogo

**Srinagar, May 27 (Agencies):** Honibarnü Kashmir nung sepaitemi Hizbul Mujahideen commander aser pa den yariteper ka khaset aser iba atema lungkak aidang civilian ka süogo aser aika yirua lir.

Arishi küm 27 tain Sabzar Ahmad Bhat ji taoba Hizbul commander Burhan Wani melenzüksang ta bilemer aser pa Tral nung sepaitemi khaset.

Yaküm sepaitemi Wani tepsetba sülen Kashmir lenden nung nübertem India anema lungkak ait. Tatalokba balala nung sepaitemi nisung 100 shi khaset aser aika yirutsü.

Honibarnü J&K sorkari tensa tamajungba mekümdaktsütsü atema mobile internet shibangtsüogo aser külen Hurriyat Conference-i Bhat

tepsetba atea tejashi nung Deobar nungi anogo ananü mokdangtsü sentong ayongzükogo.

"Sepaitem den khatepdang telungpur ana khaset. Tasürtem rongnung kaji Sabzar Bhatt ta jangjaogo aser pa ya Hizbul Mujahideen nung commander liasü" ta South Kashmir director general of police SP Pani-i ashi.

(Maneni tapak 12 nung...)

## Dmr District Level Coordination Committee senden menogo



Dimapur, May 27, 2017: May 26, 2017 nü Deputy Commissioner, Dimapur Conference hall nung 2017-18 küm atema first quarter District Level Coordination Committee Review senden den 100buba tobacco free institution sentong repsema agidang Dimapur DC, Kesonyu Yhome-i district kübok school 12 nem Tobacco Free School Certificate lema agütsüba noksa nung angur.

**Dimapur, May 26 (TYO):** May 26, 2017 nü Deputy Commissioner, Dimapur Conference hall nung 2017-18 küm atema first quarter District Level Coordination Committee Review senden den külemi 100buba tobacco free institution sentong repsema agiogo.

Iba senden nung mendenbuba, Dimapur DC, Kesonyu Yhome-i iba anogo nung tobacco free sangdongba school 12 densema Dimapur

nung Tobacco free institutions ajak nem tenünsang agütsü. Tobacco free school certificate angubaji otsü ka tenzüker dang lir, ta shia pai item school tem dang chichiba tayongzükbaji tang ang tenzüksü, anungji iba tebilemsü nokdangtsü atema awareness campaign akatsüla, ta ajungshi.

Kasa sentong nung District Nodal officer, NTCP, Dr. C.Tetseo-i tesüiba küm ka tsingda NTCP-i school aser college balala

nung awareness sentong balala katsüba osang slide presentation ka ajanga metetdaksü.

Shilem agirtem dang kümshia May 31 nü World No Tobacco Day amungba indang metetdakja Drpai school tem dang iba anogomung tajangzüker ngua katettsü atema sentong balala ayonga amungtsü mepishi.

Iba senden nung Dimapur DC-i school 12 nem Tobacco Free School Certificate lema agütsü.

## Kma nung KDLSA-i poster yangluba tetoktepba ayong agi



May 27, 2017 nü Kohima orphanage & destitute home nung legal awareness sentong nung KDLSA team den Kohima orphanage & destitute home tanurtem külemi tangokba noksa nung angur.

**Kohima, May 27 (TYO):** May 27, 2017 nü Kohima District Legal Services Authority (KDLSA)-i GMS, Kohima orphanage & destitute home nung legal awareness den "Tanurtem Temeten" omen nung poster yangluba tetoktepba sentong ka ayonga katsüogo.

Cyber Crime onük nung jembidang Panel Laywer KDLSA, Wapanginla Kichu-i Internet amshiba ajanga tajangzüker aser takoksatem indang den külemi Information Technology act, 2008 aser Indian Penal Code kübok temerenshi balala indang metetdaksü.

Laisa cyber-crime dak sendakba nung social networking sites nung taila profile amshia ozüing alema inyakba mapatem, online ajanga tesempatep adoktsüsa prokba, Email account hack asüba aser credit card ochimashi maparen atema temerenshi balala indang metetdaksü.

Tanurtem Temeten onük nung jembidang Panel Lawyer KDLSA, Hisinlo Himb-i

tanurtem indang temetentem, Right to Education act, Juvenile Justice act, 2000, Prohibition of Child Marriage act, 2006 aser tanurtem mapa inyakdaksüba ajanga parnok temeten anema inyakba indang metetdaksü.

Poster yangluba tetoktepba indang temetettsütem Panel Lawyer KDLSA, Zheviholi Swu-i metetdaksü aser iba tetoktepba nung class 5-8 kaketshirtem parnok 20-i shilem agia liasü.

Mezüngbuba jenjang tanabuba aser tasembuba jenjang nung takok angurtemji Kevichulie, Cradle Ridge nungi Asangthang aser Jenithung liasü aser Yasongwo o Philip nati consolation sempet angu. Takok angur asem nem senpet sen 2,000, 1,500 aser 1,000 agüja liasü.

Kasa sentong nung Government Pleader, District court, Kohima, Alezo Kire-ia kaketshirtem dang lesson meranga azüngtsü aser sensakertem yaria ochi temeten agütsütsü asoshi tarutsü nung law azüngtsü ajungshia liasü.

Ano Alezo Kire-i tenlaba

nanglong aser Zheviholi Swu-i tenlaba bandage tanurtem nema lema agütsü.

Kohima Orphanage incharge-i sentong tenzüka sarasadem aser tanurtemi ken ka ajanga shilem agi.

Iba sentong ya Panel Lawyer KDLSA, Keduvi leniba nung agia liasü.

## Khar yimdak dental health camp kaogo



May 27, 2017 nü Khar yimdak angati Oral & dental health camp nung IMDH, Mokokchung nungi Dr. N Moa Jamir Senior Dental surgeon den tepu doctor tem aser Khar sub-centre nungi Medical staff temi külemi tangokba noksa nung angur.

**Khar (Mokokchung), May 27 (TYO):** Indian Dental Association, Nagaland State Branch-i ayongzüka May 27, 2017 nü Mokokchung district kübok Khar yimdak angati Oral & dental health camp ka katsüogo.

Iba camp ka campaign ka mesüka liasü aser Kohima nung amungtsü aliba 10buba North east Regional Dental Conference nungtem nung ayongzüka liasü.

Dr. N Moa Jamir Senior Dental surgeon, IMDH, Mokokchung leniba nung district nungi tepu doctor tem aser Khar sub-centre nungi

Medical staff temi yaritepa iba camp kaogo.

Tepu dak sendakba timtem alir nisung 160 tenüing zülüoka iba camp nung angati teyari agi. Parnok rongnungi nisung 51 tepu agizüka intoktsü, nisung 15 oral prophylaxis (merüksü), nisung 16 tepu melentsü, nisung 25 nem tepu anepalutsü shisatsü agütsü aser tanüngbatemji general patients ama anepalua liasü. Iba camp nung Medical officer CHC Mangkolemba, Dr Jetilo Magh-a den iba sentong takok ngua katetogo.



Mokokchung, May 27, 2017: Headquarters IGAR (North) kübok 44 Assam Rifles-i Mokokchung district kübok Ungma yimdak tzu litre 10,000 capacity, RCC Water Storage Tank ka yangluja May 24, 2017 nü semzüka sentong nung tangokba noksa nung angur. Tzü rizüngba tank ya ajanga yimdaklirtem nungdak peritsütsü aser tanga nungdaktema tongzüksü.



Mokokchung, May 27, 2017: Honibar aonung Lord of Rocks teloki Mokokchung town hall nung kenten sentong ka nung shilem agidang tangokba noksa nung angur. Parnoki 1980's mapang nüburtemi sapuba rock ken tajung aika tena tesentepertem tzuratemdakogo. Par telok nung züngsemtemji music luyimba nung takutet tesa lir. Lord of Rocks asoshi ibai mezüngbuba commercial concert ka lir aser yang nungi tenzüka parnoki yimti balala sema kenten sentong ayonga jajatsü parnok nükjidong lir.

## Taoba Assam CM-i BJP minister anema bushisüngdangtsü akhanger



Tarun Gogoi (File)

**Guwahati, May 27** (Agencies): Honibarnü taoba Assam Chief Minister, Tarun Gogoi-i sübokrem agiba ken o nung BJP nungi Minister ka anema CBI nem bushisüngdangdaksütsü atema takhangba agütsüogo.

Gogoi-i, "BJP sorkari, parnok ochimashi anema

maparen tenzükogo, ta jembiba nung onoki mamangteter. BJP sorkari Ranjit Dutta (Irrigation minister) aser senotsü sübokrem indang ken o nung Assam Public Service Commission (APSC) anema CBI nem bushisüngdangdaksütsü onoki (Congress) akanger. Onokisa Tuliram Ronghang

(BJP lenir) anema-a CBI nem bushisüngdangdaksüner," ta metetdaksü.

Ochimashi sen agiba ken o nung March ita nung Irrigation Secretary, Kujendra Doley apuba sülen minister tenünga jungkai adoka liasü. Iba dak sendakba nung sorkari minister kümzüka ayur, ta paisa aitsü.

Bill angutsü atema contactor kati süborem sen 15,000 agütsübaji Doley-i agizükba atema anti-corruption cell-i pa pua liasü. Tesülen cell-isa pa indang office takdang nungi sen lakh 45 aser par kidang nungi sen lakh 11 pua liasü.

Minister tetuyuba kübok pai contractor tem dang nungi sübokrem agi, ta tai tonglokja lir.

Ano sübokrem agia mapa agütsüba ken o nunga APSC chairman Rakesh Kumar Paul den tangar aika police-i pua lir. Tang parnok ajak judicial ket nung lir.

## Dhola-Sadiya apu ajanga rong amshir aayangertem takoksa angur



Dhola-Sadiya apu

**Dhola, May 27** (Agencies): India nung apu talangtiba, Dhola-Sadiya apu lapokba ajanga anogoshia rong amshia aayangertem aayangba maongka makai kümogo.

Hokolbarnü Ato kilonser, Narendra Modi-i iba apu ya Assam nung aliba Brahmaputra ayong nung lapokja liasü.

Iba apu lapokba ajanga Assam aser Arunachal Pradesh nübur million aika pelatepdang rong amshia aayanger nisung 150 shibo joko rong amshia sen maatetsü, kechiyong joko tang

nungibo nisungtemi Brahmaputra ayong ajangdangtsü atema parnok indang rong nung mamentsü.

Iba apu lapokba ajangasa rong amshir aser parnok den inyakertem nisung 2,000 shi rong amshia aayangba mapa makai kümogo.

Iba den külemi ayongküm tip ana nung aliba Dhola aser Sadiya na nung hotel lapoka alirtem aser item hotel nung inyaker ajak senteper nisung 1,000 shi mapa makai akümtsü.

Yashi Sadiya nung rong

kibur nisung ka tenüng agi Lalit Kachari-i, "Joko ni kechi mapa inyaksü'ar ni memetet. Tanü tatensa, anüngdang 12:00 ako tashi ni iba maparen inyakogo. Tang tesüsa onoki Ato kilonser reprangi aotsüpur passenger tem Dhola-i anir ao," ta ashi.

Ajisüaka Assam Chief minister, Sarbananda Sonowal-i, pai rong kiburtem aser staff tem nem tanga lenmang ajanga teyari agütsütsü atema inyakdar, ta shiogo.

Ano rong kibur ka tenüng agi Naqib Ali-i, "Atangji sorkari onok nem teyari agütsütsü ta shiogo. Ajisüaka tang tashi nungbo onoki teyariji ngua mali," ta ashi.

2003 küm taoba mapang Sadiya nungi Asom Gana Parishad MLA aser tang BJP lenir, Jagadish Bhuyan-i shidi ka ajanga taoba Ato kilonser, Atal Behari Vajpayee dang iba apu yanglutsü atema mepishia liasü.

yashi iba apu melapokdang osangbenertem dang pai, "Iba apu lapokba ya nisung aikati yongyaa aliba atangji nung atalokba lir," ta ashi.

## Arunachal nung rakzükkrakdemer 4 apu

**Itanagar, May 26** (Agencies): May 22 nü D Sector Naharlagun, Director of Audit and Pension office nungi rakzükkraktemtsü meranger parnok 4 police-i brehostibarnü puogo. Aibelena alirtemji; Koloriang nungi Chello John(24), Village Para, PO/PS Seppa, East Kameng nungi Kurung Kumey, Sonam Para (24), Village Kilo, PO/PS Chayang Tajo, East Kameng nungi Sime Killo(35), aser Village Bodo, PO/PS Chayang Tajo East Kameng nungi Rima Bodo(30) ta jangjaogo.

Osangbenertem den jembidang, DIG Western Tassar, SP City Dr. A. Koan aser iba meita aoba maparen nung shilem agir ketdangsertem-i ashiba agi, yimti police-i par pezüi rakzükkraktemtsü asoshi sentong kanga junga yanglur aliba raksatsüogo. Police temisa ashiba agi, par pezü anema ken o ano aika benokogo kechiyong parnok iba amala maparen mapangshia inyaker. Parnok ket nungi AK prangbong aser grenade apuba dak sendakba nung item osettem bener aruba tesem indang osang tejangja agütsütsü asoshi DIG-i memolungi liasü, kechiyong iba ajanga bushisüngdang nung timtem adoktsü akok. Aji saka police-i prangbong aser grenade-ji Assam nungi bener

aru ta metetdaksü. Parnok apuba mapang nung parnok ket nungi AK-series rifle ka den magazine ka, injang 12 aser grenade ka ta apu aser iba sülen bushisüngdangba mapang nung grenade 2 injang 11 aser hadir tila kar densema apu, ta police-i metetdaksü.

Par pezü yagi, Audit and Pension Director, M. A Basit prangbong agi teneter rakzükkraktemtsü merang, ajisaka Director-i ola agütsüba ajanga parnok AK ka aser grenade ka ta toktsür jena oadok, ta police-i ashi.

DIG-i ashiba agi, iba rakzükkraktem mapa meinyak tsüngda parnok ni nüburttem tsübudaktsütsü asoshi camouflage süoshi semer AK prangbong amer video yanglua prokshi.

Tassar-i ashiba agi, SI K Yangfo, OC PS Banderdewa-i anir bushisüngdang tenzük aser parnok Bodhbarnü Chello John apu. Iba sülen pa dang ashishiba mapang pai iba rakzükkraktemba maparen nung densema alirtem tenüng metetdaksü. Tassar-isa ashiba agi Director office-i aisangji Chello John liasü.

Parnok rongnung Sonam Para ya Naharlagun E Sector nung SI Techi Naga aser PS Nirjuli nati aniba teloki apu. Sime Kilo ya tanü Kane yimtsüng nungi apu aser iba sülen Rima Bodo apu.

## Silchar-Guwahati train nung telungpurtemi injanga akha ta osang taila prokshi



**Silchar, May 27** (Agencies): Nüburttem tipmetemi kümdaktsütsü nükjidong nung local media house kari Honibarnü telungpurtemi BJP züngsemtem mener aliba Guwahati-Silchar special train ka dak injanga agi khaa nisung 4 yirutsü, ta osang prokshi. Ajisaka iba osang ya nisung kari train dak long agi aondang

corridor nung nokdaka aliba nisung ka yirutsüba ajanga adok ta jangjaogo.

Iba lendong nung yirusang Samsul Jamal (53) den jembidang pai ashiba agi, iba tatalokba ya Haflong station madong tsüngda anepdang 6:10 shi nung atalok. Iba tatalokba sülen pa 10:40 or Silchar Medical College-i temang anepalutsü asoshi anir ao.

## Lendi nung shishilembartemi longkak ait

**Guwahati, May 27** (Agencies): Lendi nung shishilembartem Ato kilonser Modi state semdangtsü aliba agi shishilembaba khen atema anendaktsüa aliba Honibarnü nungi maneni shishilemba tenzükogo. Aji saka Guwahati kübok Fancy Bazaar nung tensa mejungi lir.

Lendi nung shishilembar noklang aikati Jail road nung lenmang külen dang shishilembadaktsüba atema Guwahati Municipal Corporation (GMC) anema longkak aita.

Parnoki ashiba agi, takarterem pusema GMC-i puri parnok iba tesem nung shishilemba mesüdaktsür.

### GOVERNMENT OF NAGALAND

#### DEPARTMENT OF SCHOOL EDUCATION

NO.ED/ACT/MONITORING-1/2013

Dated Kohima, the 26th of May, 2017

#### NOTICE

In continuation to this department notification letter even No. Dated 19th May 2017, it is hereby informed to all the employees of School Education that the "verification of absentees for GPS survey" is extended till 17<sup>th</sup> June 2017 in the Directorate.

Verification shall be done as per the schedule listed below:

District	Date of Verification
1. Tuensang and Mon	29 <sup>th</sup> to 31 <sup>st</sup> May 2017
2. Mokokchung and Wokha	1 <sup>st</sup> to 3 <sup>rd</sup> June 2017
3. Phek, Kiphire and Longleng	5 <sup>th</sup> to 7 <sup>th</sup> June 2017
4. Zunheboto and Peren	8 <sup>th</sup> , 9 <sup>th</sup> and 12 <sup>th</sup> June 2017
5. Kohima and Dimapur	13 <sup>th</sup> to 14 <sup>th</sup> June 2017
6. Directorate Officers and Staff	15 <sup>th</sup> to 17 <sup>th</sup> June 2017

The following documents are to be produced at the time of verification.

- 1 no. Colour Passport Photo
- Government issued ID Card/ Passport/ Voters ID Card (Any one)
- PAN Card/ AADHAAR Card
- Appointment Order
- Matric (HSLC) Admit Card

Those employees who had failed to show up during the survey at their posting places are directed to bring valid reasons with supporting document proof for their absence during the verification.

This verification is also required to be done by Part-time Instructors & all other CSS appointed employees under SSA, RMSA and Hindi (CSS).

(SMITA SARANGI) IAS  
PRINCIPAL DIRECTOR



# TIR YIMYIM

## YIMOBILEM (EDITORIAL)

DIMAPUR SUNDAY, MAY 28, 2017

### OSANGTAJUNG SHIYONGA Aoba

**A**senoki ajuruba tensa tia ajak nung asenoki asenoksasa bilemdangtsüsa akümba mapa ana lir. Kaji, iba yagi kü dak koma kongshir, aser ano kaji iba ya ajanga Tsüngrem yimli nung koma inyaker? Aji oda, alima nung Yisu Khrista temeim osang tajung abener rongnung kechi tia arudir aruaka, tensa tia nem pa mekokdaktsüi, paiang tensa tia kokteta osangtajung sangdongsangjibo tenyar Paul-ang asütsü. Aji oda, pa kechi tia nung lidir liaka, iba tensa mapangji komaser Yisu temeim kulisüba nung endoktsü ta bilemba, reprangdangba aser kuli süba nung Paul-i takok kanga junga ngua inyaktetba asenoki Filipi tapu nung azünger. Pa kodang tepuokdak küm ana tashi liasü, iba mapangjia pai pa asoshi Yisu Khrista temeim osangtajung kuli asütsü mapang tajunga ta reprangtet. Iba tangatetba jagi pa tasü itta aküm aser pai paji tepuoker ka ama masü saka Khrista nung takoker ka ama bilema inyak. Paul taküm nung iba ama tensa tia ajuruba aser pa tamang aser tangatetba indang Filip 1:12 nung, " adianutem, kü dak kechisa atalok, aji agi osangtajungji taliang ayimsünga aküm ta ni nenok nem metetdaksüner," ta jangjajangjaa shia angur. Iba tekong nung shia aliba yabo rasaa mashiyonga asenoki ajaki angatetter. Aji oda, Roman chuba Nero yimli nung Paul tepuokdak ayuba jagiang Paul-i pa anüker sepaitem danga osangtajung shitet aser sepaitem aika temulung meyipa Paul-i amangba Yisu Khristaji parnok taküm nung kibur aser kümtetdakba ta agizük. Iba kasaji kodang teloki Paul aser Sila maksüja süoshi dena shizüktsür tasü küma züker tepuokdak ayu, parnok atemabo iba tensa tiaji Yisu Khrista osang tajung kulisütsü mapang tajungtiba liasü. Iba tensa tia nungji parnoki ken aten aser sarasadema Yisu temeim kuli asüba ajanga tanükertem temulung meyipa asenoki Tenyar Mapa 16 nung tatalokba otsü tejangja shia angur. Tamang nung tasü aitertem atemabo tensa tia ajakji Tsüngrem temeim kuli asütsü mapang tajungtiba ta Paul aser Sila nung taküm kuli ajanga asenoki angatetter. Iba jagi asenoka tasü aiter. Aji oda, Paul nungertemi tetsübu melii tensa tia ajak nung ajak dang Yisu temeim kuli asüba jagi tangar adianutema parnok amaji metsübu Yisu temeim kuli asütsü tasü itdaksü ta kasa Filipi tapu 1:14 nung shia angur. Iba amaji asenok Khristan taküm nunga aiben timtem ajurur. Atangji, tanü tashibo asenokbo Paul nungertemi ajuruba tetsübuttsü tia aser Khristan yimsü anemertemi reshikangshiba aser tepuokdak ayuba tensa tia tashibo majurui alitsü akok. Ajisüaka, asenoka asen tamang aser mapa yari aiben tensa tia tamajung ajurur. Aseni mounübaleni yoker, meinyaknüba inyadkaksür, sen tenük masung agütsür, nungsen jembitsür, menütsür, nungdak meperiteter, teyaritsüla aika adoker, taotsüla aiben adoker, aiben temang manemi alir, tangari asenok dak temulung malemer ta asüba tensa tia agi asenok aiben tezudangdaksüa akok mesüra mepelai aser tasü meiti kümdaktsütsüa akok. Iba mapang nung asenoki Paul aser Sila taküm otsü bilemtettsüla. Iba jagi asenok Tsüngrem nungi tashi tasen angutsü. Aji oda, tang ama linük nung Khristan anemertem tali bolua akümdang, parnok anema jembitsüba tetsübuttsüka asütsüa akok. Ajisüaka, Khristan yimsü yabo tsübuseta amangba yimsü ka masü saka asenokji 'takokertem dang nungia taoba'(Rom 8:37) ta amanga Yisu temeim kuli asüba tamangba yimsü lir. Iba anogo shia asenok sobaliba südaksüdi.

**[Temetettsüka - Rom 8:37 nung "asenok ya takokertem dang nungia taoba," ta aliba oren ya BSI Version Ao Naga C.L. Temeshi Lai nungbo shia mangur! ]**

## OLEMSABANG

### Ao Lima "Land Of Revival"

I. Imdong Jamir, Sungkomen

*(Yashi adok nungi...)*

Temeim Arogo lenirtem, Arogo tenzükla, tenzükertem kibuba Yisuer tsükmenatsü lu nung tenzükertem kibuba Yisui temeim mapa indang jembiba o rongnung tongtipang kar. "Saka nenok asoshi kotak nung rongsen rizügang." Mt. 6:20, asenok ajaki chirnur semchi semnur ajak yutsür asütsü, saka kibubai asen mapa tajung kotak nung rizüngtsütsü. Putir Zakarie Abia nübur liasü, pa kinungtsü Aron semchir ka tenüng agi Elisabeth liasü Luk 1:5. Alemlü tebu Aron shiba arem min nung Israel purtem asoshi Putir mapa tulu inyak iba temeim mapa tuluji kibuba Tsüngremi rizungja liasü.

Alemlü 18th Century alima tazü arem shiruru tia nung alidang American Missionarytemi, ita 6 tzüym nung jaja arua asen lima atong meyipa reprangrapang ibai tesüngmangtsüka lir. Asen Aokin jilu, jakla, yimya repranga amangertem meyrjang aika lir. Anungji kibuba Tsüngrem matsüngdang kümkümshitsü, aser Revival tanüla milak, yokang langpang nungi ainkar o jembir lanur shisashir tajung adokdakjang ta temulonger meyrjang 50, 60-i bo sarasademtsü tanü mapang lir.

Israel kin otsü reprangdang temeimtsü tia nung arua lir. Yakober kibong Padan Aram lima toktsür pei limai apusotsü pungmang nung jembü. Par kibong apusoa arudang Yakobi kanga khuret bona jipa kudi Esau shiba ni aser ozü kibong ajunga lepsettsü osang yoka lir iba lendong nungi kümzükang ta pai aiben jeba sarasadem. Yakob sarasadem langzua Jabok ayong ajangdang aonung KOTAK TENYAR ajurua pa Revival tanüla temishi den melangtep. Tsüngrem sentong tulu. Iba anogo pa Yakob nungi Israel tenüng melen, sentsü senpong, temulongjang ajak revival agia melen. Yakobi ashi "NI TSÜNGREM TEJAK NGUOGO." Lip 32:30 Kotak tenyar den melangtep dang Yakob tebi loktet, ajisürbo pa atoka-atoka jaja. Iba anogo nungi "Israel chirtemi tepi tazung shi tetsü tanü tashi machir." Lip 32:32. Iba anogo nungi Israel chirtemi kibuba Tsüngrem den tali sendaktepa jaja. Yakob nungi Israel ajabaji (Revival lir) Zefania ainker ajanga kibuba Tsüngremi ashi NI MILEN AMER YIRUSALEM BUSHITSÜ Zaf 1:12. "NI MILEN AMER AO KIN BUSHITSÜ."

Asen Aokin asoshi tanüla akar tamang tir American Missionarytem angati tanüla nüktzü agi mangyima jeber aoba otsü lir. 1948 May 14 nu Israel kin nüchiso angu. Prime Minister David Ben Gurin-i anir Israel Parliament nung jeptepa Tsüngrem nem tenüngsang agütsü. Pai American President Trueman den ajurutepa küm meyrjang anashi alar süngra nung aliba kibuba Tsüngremi onok anitetogo, ta tepela salem o jembidang Tamarener tulu tenapronglai Tsüngrem nem tenüngsang agüja sarasadem dang tesüiba tia bilemteta kanga ajebba otsü lir.

British nungeri alima ajak amokbanger aliba mapang Sibsagarh nung British nung Maj. John Butler-i "A Sketch of Assam otsü züludang Naga nung arem shiruru, tetsübuttsüka, tesempatsüka, suro-pangru arem shiruru jakden, mangsa tekolak dang bushirtem ta pai jembia zülü. (Ibai Sibsagarh nung) Iba anogo nungi American Missionary shirnok America pei lima toktsür Assam arua atong parnoki yamai jembü "tanü tekolak bushirtemji pa ajanga Khrista bushirtem kümdaktsütsü." Alemlü tamangtir American Missionary temi shienba o temji asen Aokin dak mongja monga lir.

Ao Arogotem nung, kibongtem nung, tetsü tebu-i anir Kibong tekülem kodang agidir, "IBAJI REVIVAL LIR" aser Kibuba pelaba asenokdak amonger. Yoh 15:11. Kibuba Tsüngremi Yakob dang ashi, "Yakob ni nü den lir. na kolenisa odir ni kümzüktsü." Lip 28:15. Saka Yakob daka tashimait tilaka liasü. Yakobi Leala sempar ta ngua kibubai la nu menden lapokja jabaso 4 sotsü. Yakob o Rachel na tanur masoba len nungi mepelatep adok. Saka Tsüngremi tena temulong tanüla meputepa angu. Lip 29:31. Lip 30:1. Aser Tsüngremi Rachel bilemtet Lip 30:22. Kibong nung Revival akaba ajanga tepela tesünepji tesüngmangtsüka lir.

"There is no greater paradise than peace of mind." Alima nung kibong nung pelatepa, asaya menütepa, tajung jembitepbaji kibuba Tsüngremi pelar. Tanur kaketshirtem takok osang ajak chirnur nungi Anungji, "SPARE THE ROD AND SPOIL THE CHILD." Tatemokba chir jagi teti maksü korang bener arutsütsüsa. Kipok sayuba makarbo nükjidongtem mataloker As 15:22. Kipok tesayuba bulua alidak tekümzük lir. As 11:14(b) Kibong nung mepetmesü mulong mepu adokba ajak tebang temeli mazüokba nungi adoker. Iba nungi molumi mi adokdaksür. Yob 3:6 (a) (f) Adianutem shiba taküm meimer aser anogo tajung nguner tamajung nungi pai pei tanüla aser tiazü mejembitsü Pei tebang mechi sotang. I Peter 3:10. Temeli mazüoktetba kibong kodanga sünepa malitsü.

KIBUBA TSÜNGREM ASENOK DEN TETI DENA LIR. Naga tenem nung asen Aor chuba tir menden nung kwi APANGEMERTEM mena lir, walunir kwi lir, takataiter kwi lir tekülem ki tekong tenem ajak nung asen Aor tekülem ki Hon Marble agi yangluba tekülem ki kwi lir. Tekülemi aoertem kwika tetsüng tesa agi arur, meshi-metsür kwi yimdong nung nümsüa lir. India nung tamarenertem arua lokti nung jembidang temesüng o agidang jembir, parnoki meteta lir. LAND OF FESTIVAL - TO LAND OF REVIVAL ji asen lima lir. Tekülem ki Hon süngkümpongi aidang lakh lakh jenjang car kar tuluba kar tuluba, tekülem kima sünga yur tekülemi atuba angudang kibuba Tsüngrem dang aakasa aiter. Tekülem nung Tsüngrem o angar senshidang, kima bell atemtsü, kanja, kanja, külen azü asangteper sir, sir ta kilir senteper. Marble langpang nung azüazüa mener pei chir pei jala jabaso den külemi ojala, obala asenok külemi sarasadem chiyongdi ni ta shir sarasadem agi chiyongbaji koda tepelatsü (ALIMA KOTAKJI IBAI LIR) KIBUBAI KOTAK NUNGI REPRANGER TK 33:13. KIBUBA TSÜBUBA JAGI ARUSHI ATSÜLANGER AS 10:27.

SHAKESPEARE-i ashir "We know what we are, but know not what we may be." Saka tajung inyaksü aser teputeptsü tama, kechiyong ibala tenlatem agi Tsüngrem temulong achir. Ibrü 13:16.

Oh Kibuba Yisu nü chir kwikati iba osang tajung züngdir par kibong nungi Revival adokdakjang. Amen.

"ANU YIR OAGI ANEPDANG TAJUNG YISU DEN KOTAK NUNG ALITSÜ. TATEM MAKADAK." AMEN

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**

## Ao Baptist Pastor Fellowship ajanga Aoli Arogotem ajak dangi

*Temeim sannüker aser arogo nung tenzükertem,*

Tamasa Ao Baptist Pastor's Fellowship (ABPF) nungi Yisu temeim salem tulu lemsateper. ABAM Office ajanga osang yokba (shiti ajanga) ngur alitsü amanger. Iba osang dak sentakba maparen arogotem nung sannükertemi anir inyaksü ABPF ajanga ano yamai khen nenshia metetdaksür:

1. June 1, 2017 aonung 7 ako (IST) shitak nung Ao Baptist Arogotem ajanga nung Sentep Ki shia nung tsüngtsüng tenetben (7 times) atemtsü aser amangbapur shia kong lidir liaka minute ishika pei aliba tesem nungji Clean Election atema aser India nung tamangertem reshikangshiba atema sarasademtsü. Iba tsüngtsüng ya hopta ka tepiyong aonung shia kasa mapang nung tema sarasademtsü, iba sülen tsüngtsüng metemaka aonung shia 7 ako shitak nung sarasadembo agia aotsü, aser aji Tsüngremi mulungba mapang ka tashi agitsü. Sannükertemi tekülem sentep nung kanga junga rasa shiangma. Iba kasa aonung nungi ABPF aser ABAM ajanga yokba ama sarasadem yinzü 7000 hours tenzüksü; ajaki kanga dang nendaka pei ataba shilem agitsü ayongzükter.
2. Clean Election theme song Mr. Wati (Samaro) ajanga mejemer joko recording studio nung tan hopta tsüngda tembanga inyaksü lir. Iba ken sound track dena yangludagi, kodang temdir sannükertem WhatsApp ajanga arogotem ajak dangi ken denji sound track yoktsü. Sannükertem kar WhatsApp group nung melira nü WhatsApp number teküboklen agüja aliba ABPF Mendenbuba dangi yokangma. Iba ken July 23, 2017 Aoli arogo sannükertem pulpit exchange asüba anogo nung atentsü renema atatsü mepishir. Iba sülen Aolima tekong tenem ajak nung iba ken atentsüsa tenla kidang amangbapurtem ajak dang sayutsü mepishir.
3. Asenoki renemba ama Clean Election wako (flag) yangludagi; arogotem ajaki sample bener yoktsü. Iba wako yaa 23rd July sannükertem pulpit exchange agiba sülen kija aser kibong shia nung temulungertemi asongtsü. Pei arogo den apet iba wako agütsütsü sentong tajung yanglua inyaksü sarasadema atadaksüner.

Tsüngremi item sentongtem ajanga Ao lima aser Naga lima ajanga nung election merüka agitetsü kanga dang sarasadema aser kanga dang nendaka inyakdi ta ayongzükter.

**Temetetsü :** Iba osang ya ngur pei area Sannükertem Telongjem mendenpurtem ajanga osang yoktepangma

**Kibuba nung tenzükter**  
Sd/-  
**N. Lipok Jamir**  
Pastor, Ao Baptist Church Diphupar  
Mendenbuba, ABPF  
Ph-9615370625

## ANOGO ABEN TSÜNGREM DEN

### TSÜNGREMI NA AGIZÜKDAKTSÜSÜ NAI MERANGER ASÜ?

**Saka ka dang tenügdaksü lir. Aser Mari-i la nungi bona maotsüsa tajungba shilemji shimtetogo. - Luke 10:42**

Teti nai telemtetba/teshimtetba ka shimer iba nung tashiyim mali. Saka teshimtetba den teinyak mapaa arur. Kodang aseni Tsüngremi shimba shimtetdir Tsüngremi anebalur. Tsüngrem nungi masü asen sasa shimba nung asenok teinyaksü lir. Tanü azungba Lai nung tetsür shibai Yisu lar kidangi jaok aser ki mapa aika ajanga la mazüngi mapa inyakdang Yisui ashiba mangashi, ibai tejashitsü ka liasü. Tarsus nunger Saulia Khrista majuru tashi pai Khristantem rishikangshia tepsetba Kibuba tenzükter ta bilema liasü. Idangji pai pa sasa aso/ayi nung metsür ta angatetta Yisu dang asüngdang. Nai kü nem kechi inyakdaksüner ta asüngdang. (T. Mapa 9:6).

Marthai Yisu nem la tejangraba angatetdaksünü. Yisu mechiyongidang aotsü koka liasü kechiaser Pa chiyongtsüji Tebui mulungba inyaksübaji liasü (Yn. 3:34). Kodang Marii la temulungjang lapoker Yisu tsüngdang mener Pai ashiba anga liasü lai "bona maotsüba nungdak kaji" shim. Melenteptsü makok! Teti tatem maka shilem tajungji ne den alitsü. Chiyongtsü asoshi Yisu Marthar kidangi maru. Taküm agütsütsü asoshi Pa aru! Marthai jaok, saka Marii senmang amang.

**Kibuba Yisu, Nai mulungba ni shimtsü kü mulungjang lapokjang. Amen.**

## China ketdangsertemi arogo ka dang sen 7 million yuan senchi achir

**Guiyang/Guizhou, May 26 (Agencies):** China kübok Guizhou province nung religious affairs bureau ketdangsertemi kidang adenshia Tsüngrem külemba arogo ka dang sen 7 million yuan (\$1,020,200 USD) senchi chiogo.

May 19, 2017 nü Nanming District Religious Affairs Bureau ketdangsertemi Huoshi Church sannüker Su Tianfu dangi shidi ka züluba nung, Huoshi Church nung pa den ano tanga sannüker kati sen 7 million yuan senchi agütsütsüla ta zülua liasü.

Tanga sannükerji Yang Hua lir aser pa ya tang tepuokdak yua lir. "Aonung 7:00 ako meta nisung kar ozü kidangi aru. Parnokji ethnic and religious affairs bureau nung ketdangsertem liasü" ta Su-i osangbener dang metetdaksü.

"Taoba mapang parnok city management & planning department tem tenüng nung aru aser onok adenshiba ki melenba atema tai tongloktsü. Mezüngbo senchiji 100,000 yuan (\$14,500 USD) dang liasü saka sorkari 200,000 yuan (\$29,000 USD) talila ajungkettsü" ta paisa shisem.

"Onok ket nung senchi agütsütsü sen maliba agi sorkari ozü ki aser Huoshi Church accountant Zhang Xiuhong indang gari agiogo" ta Su-isa ashi. Su aser Yang nati temelaba

magii tamangba yimsü indang tesem amentet. Huoshi Church shibangtsüba sülen April 2009 aser November 2015 tsüngda sannüker anati, temelaba melii arogo tenzük aser sen 7,053,710.68 yuan tenla benden, ta Nanming District Religious Affairs Bureau-i agütsüba shidi nung shia lir.

April 10, 2009 nü mezüng sentep agiba nungi Dec. 9, 2015 nü ketdangsertemi arogo shibangtsüba tsüngda tenla sarutetba sorkari meshir. Parnoki Zhang Xiuhong apuba sülen arogo indang account book bener ao aser iba nungjagi tenla sen aruba osang metet, ta Su-isa osangbener dang ashi.

Arogo dangi tenla arubaji maparen balala inyaka arudang aser arogo züngsemtem timtem ajurudang amshi. Tang par arogo ket nung sen million 7 yuan mali, ta paisa shisem.

Senchi memenokra ketdangsertemi tanga arogo züngsemtem indang kiojentem agitsü atema Su-i tsübuba bilemba lemsateper.

December 9, 2015 nü ketdangsertemi Huoshi Church shibangtsüdang Yang den tanga Khristantem apu. Küm ka dak tema tepuokdak ayuba sülen January 6, 2017 nü okadaki pa ano küm ana ser tesadang tepuokdak ayutsü temerenshi agütsü.

## MBA Social Concern Committee-i Free Detox Camp agi



**Dimapur, May 27 (TYO):**

May 15 nungi 2, 2017 tashi Mangkolemba Baptist Arogo Social Concern Committee-i acha-ayanga Free Detox Camp ka CTC, Aolijen nung agia liasü.

Iba sentong nung yi ajemer parnok nisung 23 tashi shilem agia taküm nung temelenshi tulu kaogo, ta MBA Social Concern Committee, Convenor Amongla. B Jamir-i sangdong

ka nung metetdaksü.

Iba sentong nung tongti shilem agirtemji, Wb. Moatoshi Counselor. MTBA, Wb. Süngküm. Jamir Kohima, Dr. Medem. Mkg, Kr. Akala Nurse Mkg, Wb. A.Wati.Lkr Asso. Pastor Mba, Wt. Amongla. B Jamir Asso. Pastor Mba nungertem liasü.

Iba sentong nung Arogoi sarasadem den rongsen jenti indoka yariba atema aser tesayurtemi nübu agütsüsetba asoshi ajak dang pelaba lemsateper, ta Amongla. B Jamir-isa metetdaksü.



ABAM Arunachal Mission kübok Poakkoam Mission Centre nung children rally cum children ministry launching programme May 26, 2017 aonung nungi tenzüka agidagi. ABAM tenüng nung Mrs. Abenla Aier, Child Promoter ABAM ajanga iba sentong lapoktsü. Arogo balala nungi tanurtem ajak agi parnok 154 arua iba sentong nung temoatsü tulu ngua mongdagi aser iba sentong May 28 Deobar aonung tembangtsü. Iba sentong Mokokchung Town Baptist Churches Mission ajanga sponsor süa katsür. Nokte mungdang tenüng nung Rev. Asenba Imsong Field Director ajanga sponsor MTBCM dang pelaba lemsateper ta sangdong ka nung metetdaksü.

**OLONG PAITEP # 4434**

1				2				3		4
			5			6				
7										
								8		
		9								
10										11
					12					
13										
14									15	

<b>TIPILEN</b>		<b>LANGTSÜNGLEN</b>	
1. Arem tulu	- (3)	1. Kiset shiruru ayu	- (5)
2. Aou / Longmi	- (7)	3. Alangtet / Jenbu	- (6)
6. Maginü / Mokong	- (5)	4. Te _ _ _ tsü	- (3)
7. Sungjang ka	- (6)	5. Shishidak	- (5)
8. Süra agi yanglungba ki	- (4)	8. Nok mechira-i aküm	- (5)
9. Tasadangba / Telatet	- (7)	9. Medemer tajung	- (6)
10. Timba aküm	- (4)	11. Ki temalen / Ki nembangba	- (5)
12. Akhidang	- (6)	13. T _ _ _ ütsü	- (3)
13. Khen dang masü	- (5)		
14. Aor sü ka tenüng	- (7)		
15. Shitak	- (3)		

**OLONG PAITEP # 4433 TELANGZÜBA**

<b>TIPILEN :</b>	<b>LANGTSÜNGLEN :</b>
1. Semtu, 3. Lepko, 5. Bilem,	1. Soro, 2. Tap, 4. Kimang,
9. Tsüngsang, 11. Aoksa,	6. Lungkak, 7. Mejak, 8. Zünga,
13. Tushi, 14. Ypru.	9. Talupu, 10. Putu 12. Agi.



**LILIR-I ALOKBA DANG ASUNG DANGER**

**Lilir :** Sir..... VIP gari kolak nung light temerem remshiba (Red Beacon) agienba ajanga asen Naga lima nunga tajangzük karbo lir mali akaa...???

**Alokba :** Ayeaaa...Kechiba malitsü, asen Naga nung atema agienba amai dang adi...

- Shir koba telok meyong VVIP'ar mejangja ratamata-a adendena tsübuseta mangmangseta aliba tensa tia ajak tu melenshiogo.
- Jila ajak nung süngküm (Gate) anükertem anisüngzüka kümogo, kechiba ta süra, mashie gari ka nung taila VIP number melener light temerem remshia mabentsüla oset, machi-majemtsü chiyungtsü ajunga bener süngküm telungi aittsü, aser VIP amai bilema ajanga yokba tebilemstü ajunga pongdokogo.
- Jila ajak nung town tiyong nung traffic jam nung gari nungtepa anena akaba mapang tangar kecha isap mali, VIP-a ta ser light temerem remshia asa-a par tamasa adena aotsü tashi amshitsü...aser talisa nisung tasü mang bener aliba ambulance gari dena kecha isap mali timtem agütsüba nungi jenbuogo.
- Highway nung gari senzüdang light temerem remshiba VIP gari nung driver aser body guard temi asuküma tangar mezü ngmeshiba nungi jenbuogo. Ano aika dang shir meshima lir adi.....

~L.Kika Pongener,Aoyimküm,Dimapur.

**TANÜBO NAI LANGZÜANG**

**Q:** India nung koba state nung 2017 Asian Junior Tennis Championship akatsü?

- [A] Punjab
- [B] West Bengal
- [C] Kerala
- [D] Maharashtra

(Taruba adok nung onoki langzüksü)

YASHI ADOK TELANGZÜBA :Geneva

**Happy Birthday**

TENÜNG : YEMSENRENBA

Tasoba : May 28

Küm : 1

Tsüngremi jabaso anogo moatsü nung Pa tenüng asanger, maneni anema aliba den arishi talang moajang ta sarasademtsür.

Oja, Oba, Odi & Kinüngertem



**NAIA YA METETER MA NÜTSÜNG TIMTIBA ALIBA YIMTI**



Dhaka (Bangladesh)

Alima nung nütsü ng timtiba aliba yimtiji Bangladesh yimtiba, Dhaka lir. Iba yimti nung sq. kilometer shia nung nisung 44,500 tashi lir, ta World Economic Forum (WEF)-i tawa metetdaksü. Dhaka sülen tanabuba jenjang nung Mumbai (India) yimti lir (sq. kilometer shia nisung 31,700). Mumbai sülen tasembuba, pezübuba aser pongububa jenjang nung Medellin yimti (Columbia), Manila yimti (Philippines) aser Casablanca yimti (Morocco) lir.

**SUDOKU # 3546**

7	2	3						
	9		6	2	3	1		
		1		8		2		3
5	1				2		7	
	6	2				5	9	
	4	7		3			2	
			9				6	
2			3			7	1	
4			2	5				

**TELANGZÜBA # 3545**

7	5	2	1	4	8	6	9	3
8	6	3	9	7	2	4	1	5
9	1	4	3	6	5	8	2	7
6	2	7	5	9	4	3	8	1
5	4	8	2	3	1	7	6	9
1	3	9	7	8	6	2	5	4
2	7	1	6	5	3	9	4	8
3	8	5	4	2	9	1	7	6
4	9	6	8	1	7	5	3	2

**OJANG LUTEP # 4040**

- JASÜNGNG :
- UNTAJG :
- NTIJE :
- NGBATAA :
- SONGÜNGDBO :
- SUNNIGI :
- ONLG :
- IAG :
- ANKGA :
- SATSONÜR :

**OJANG LUTEP TELANGZÜBA # 4039**

MEDEMER TAMAJUNG DEN MEDEMA DANG NUNGIBO MEDEMER KHENYONGI MAYUBA TAJUNGBA

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



**Aries**  
21/3-19/4

Tanü nai nü nükjidong ajak meyipa reprangshitsü merangang. Mangdang tulu yur rangloktsü merangang. Tamang jenjang nunga asüngsashitsü merangang.



**Taurus**  
20/4-20/5

Tanü nai teshisadanga aika alitsü, saka nai jangraba maparen kar inyaktsü merangang. Sentsü tesangwa süoshi asema ajanga na tia tajungleni anitsü. Taonung 7:00 nungi 8:45 ako mapangji na asoshi tajungtiba asütsü.



**Gemini**  
21/5-20/6

Tanü nü tembar/kinünger kari na mangatettsüa akok. Tanü nai süngjema shisadangtsü merangang. Nikongdang 1:30 ako nungi 3:00 ako mapangji na asoshi tajungtiba asütsü.



**Cancer**  
21/6-7

Tanü ner kidang kbong nung tepela alitsü. Kibong nung timtem kar süiadokba ajanga kibong züngsem ajak molungjang nung tesünep alitsü. Tongtibang nungdak ajak nikongdang 3-4 ako mapang inyaktsü merangang.



**Leo**  
23/7-22/8

Tanü anogo nai tongtibang sentong ka lenitsüa akok. Kinünger ki kar nung sentong ka mesüra lokti senden kar nung densemstsü. Nikongdang 4:30 nungi 5:30 ako mapangji na asoshi tajungtiba asütsü.



**Virgo**  
23/8-22/9

Nai tanü ner kinünger kar yaritsü. Tain kari nü nübo nungdaktsü. Nai kar yariba ajanga tepela angutsü. Nikongdang 5:00 ako nungi 7:15 ako mapangji na asoshi tajungtiba asütsü.



**Libra**  
23/9-22/10

Tanü tamangba dak sendakba nung na ainlen senzütsüa akok. Tamangbaren nung temulung agütsüba ajanga nai tesünep angutsü. 3:15 ako nungi 4:00 ako tsüngda telemtetba tajung agitsü merangang.



**Scorpio**  
23/10-21/11

Tanü ainer kar ner kidang anenzüktsüa akok. Tanü nai sentong kar yanglur pela amongtsü merangang. Nikongdang 4:00 nungi 6:00 ako mapangji na asoshi tajungtiba asütsü.



**Sagittarius**  
22/11-21/12

Tanü na tera azümesena alitsü akok. Na kanga mazüngi liogo anungji medemertem den külemi anisüngzüka amongtsü merangang. Nikongdang 4.45 ako nungi 5.30 ako tsüngda maparen tasen metenzükba tajungba asütsü.



**Capricorn**  
22/12-19/1

Tanü nai koda masüba tensa ka ajurutsü akok, anungji nü tajungtiba agi iba tensaji koktettsü merangang. Taonung 7.30 ako nungi 8.30 ako mapangji na asoshi tajungtiba asütsü.



**Aquarius**  
20/1-18/2

Tanü nai tain kar dang nungi tangazükba tasen kar angutsü. Nai maangka aika angutsü, nai ajakji akokba tashi agitsü merangang. Tanep 10:00 nungi 11:45 ako mapangji na asoshi tajungtiba asütsü.



**Pisces**  
19/2-20/3

Nü dak aketba sempet ajanga tanü anogo nai tangar atsütsüa arutettsü. Nikongdang 5:00 ako nungi 7:00 ako mapangji na asoshi tajungtiba asütsü.

## TEMANG ANEMALIBAREN

### DDT arakba ajanga teyari agütsüba aser tanidaktsütem

Nagaland nung küm shia ramen agi aika shiranger aser iba ya nokdangtsü asoshi National Vector Borne Disease Control Program (NVBDCP) puri DDT mozü arakba sentong ya preventive measures rongnung ajak dang nungi tajungtiba lir. Taküma DDT mozü arakba sentong agiogo. Kümtem tsüngda nung nüburtemi parnok kidang DDT mozü merakdaksünüba reprangtetogo aser ajidang masü technical guideline tem sülen manidakba ajitetogo. Anungji onük kar ajanga kilong aser temeket nung DDT araktsü nungdakba aser teinyaktsü yimya kar nung koda anidaktsü, itemji yangi tuteta sayuner:

1. Ki temeket nung DDT arakba ajanga merla ajema kümdaktsür. Entomological study tem ajanga sayuba agi, Nagaland nung merlatem DDT ajanga südaktsütettsü. IRS puri kümsia March ita teyonglen khen aser August ita teyonglen khen ta anaben araker, kechiyong iba ita tsüngda nung ramen prokshir.
2. DDT ya tesem aika nung araktsü asoshi jenjang temelatiba chemical lir. Tesem aika nung araktsü asoshi iba melena tanga chemical jenjang dalangba aser effective-ba mali.
3. DDT arakba yimya shidak nung aser iba ya araktsü training agir alirtemi rakra, kilong nung DDT arakba ajanga kecha lendong magütsür.
4. DDT kima nung arakba ajanga kilong nung merla alibatema aridoker.
5. Kima nung DDT arakba ya temang asoshi lendong lir. DDT ya 'hard' insecticide ka lir aser iba mozü ya yakta samaa maer aser ali nung talangka alir. Item ya chiyongtsü ajanga belener aser bio-magnification process ajanga DDT ya tali atsüngdendaktsür.
6. India sorkari DDT ya tashidak balala nungi kümzüksü asoshi kilong nung dang araktsü asoshi melaa lir. Tanga maparen atema DDT amshiba ya Environment Protection Act 1986, Section 8 anema lir. Iba act nung yamai shia lir "Nisung shingiaia 'prescribed' süa aliba procedure shidak nung mesüi lendong aketba mozü (hazardous substance) amshitsü makok."

Kilong nung DDT arakba ya ramen nungi kümzüksüba atema dang masü saka merla ajanga prokshiba tashidaktem- Japanese Encephalitis aser Dengue amala nungia kümzüker, koba Nagaland nunga putetogo. Anungji tashidak nokdanga ajak ajungtsü asoshi iba ya agizüktsü nungdaker.

**National Vector Borne Disease Control Program (NVBDCP),  
Directorate of Health and Family Welfare Nagaland: Kohima**

### Q. Nagaland nung senzüba taxi aser auto rickshaw ajak ya Naga nungertemi dang anitsüla ta ozüng küma latet nunga koma süla ?

Naga nungertemi dang item ajakji anitsüsa küma latet nunga kanga tajung süla. Ano kou mejepta (hair salon), mesüra tsüngsem yangluba (cobbler), item amala yaah latet nungbo asen lima ya rongsen lenmang nung süshia, kibong nung süshia, kanga yaritsü.

**-SMS**

Shitakba ozüng jagi kokra ajisa tajungba asütsü. Asen Naga nung zünger mapa mangu aika lir. Anungji parnok nem inyakdaksü nungbo kangasa ajungtsü saka tsümar ama asenokibo junga meinyaktsütsü ama nibo bilemer.

**-O.J.Kma**

Naga nung ya kanga azümesen kin ka kümogo. Mapa meinyaki mener dang chiyongner. Iba yimya tamajung ajanga Naga lima majunger. Ozüngji yokra taxi aser auto aika mesenzütsü. Auyaba tali akümstsü.

**-DW Jamir**

Nagaland nung senzüba taxi aser auto rickshaw ajakji asen Naga nung dang anitsü ozüngji shitak ka latetbo ajisa tajungba süla na. Kechiba süra asen Naga nung ya zünger mapa mangu aikasa lir. Anungji kokra shitakba iba ozüngji ayubo kangasa jungla ta nibo bilemer no. Ashiba ama asen Naga nung atema bilemstsür ati.

**-SMS**

Yamaji lemtet nungbo ayatai asütsü, kechjiaser asen nisungbo azü amadang anungji pei lima nungbo kangasa tesashi aser ajak pei molungba nung nüburtem pei taxi nung angati anir senzür ama asükümrara. Asen Naga nung dokan aser hotel nunga, angati oset meshir ama aser chiyongtsü meshir ama asükümrara. Asenok ya kechi nung ajung ta kanga shisadanger saka ano tang tashi telangzuba mangur. Iba tebilemba yabo public aser tongtipangsa sensaker atema ozüng yanglurtemi sen yong ozüng küma lateta mayutsüla.

**-tiriyim webmail**

Common people atema kangasa majungtsü saka Nagaland nungbo iba amala tamaji ozüng yanglutsübaji kecha tesüngmangtsü mali. Iba ya inyaktet nungbo uniqueness of Naga history asütsü. Taoba küm asem tejaklen, Transport aser taxes department meyokteper alima nung mangashidangba ozüng yanglua gari amshir dang nungi crore aika genuine tax ama meshia amshiba amato asütsü. Naga nungeri dang taxi aser auto rickshaw anitsü ta ozüng yanglubaji jangratemtsüka asütsü saka shingiaia ola madoktsü aser osang kaket nunga itemla tesüngmangtsü mapatem indang "kechiba" ta mebushitsü, masüngdangtsü mesüra maitsütsü. Kechiaser osangkakettem ya teimba sen asoshi dang.

**-tiriyim webmail**

Asenoki kangasa ulua bilem nunga asenok yimsoshiba ya ano kangasa lanu, shiruru libaliro nungi kangabo ano mepila, anungji taaktsü maket aser tangar libaliro ano mangu. Naga nungeri iba amala tamaji ozüng laleta amshitsüji kecha tasak mali. Ajungtsü adi!!!!

**-tiriyim webmail**

Ozüngji shitak ka yanglubo kangasa ajungtsü. Asen Naga lima nung tsümar yagi süjen rüja ama kanga dang meiner. Anungji Naga nung nem dang anitsü tashiji shitakba ozüngji yanglura kanga dang tapet ka asütsü ta nibo bilemer.

**-Odi Jamir.**

**(Maneni tapak 11 nung...)**

## TAN HOPTA ATEMA - KOMA SÜLA ?

### Q. Central government-i Nagaland nung nashi maleptsü aser shibelen mesüdaktsütsü asoshi army nem tashi agütsü nunga koma süla ?

Olong 20 shi nung June 2, 2017 tashi nung iba telangzüba ya onok dangi  
e-mail - tiriyim@gmail.com mesüra SMS - 9856121232 / 9436072422 mesüra Tir Yimiyim  
Facebook account ajanga yokang. Telangzübatemji taruba Hokolbar nü adoktsütsü.

# Us sorkar den itasen data lemsateptsü asoshi Google-i memolung

**May 27, 2017 (Agencies):** US Labour Department-i Google dang parnok itasen data lemsateptsü asoshi asüngdanga liasü saka Google-i agütsütsü asoshi memolung. Parnoki ashiba agi data tem redrive asütsü asoshi kanga tasak asütsü.

Hokolbarnü osang ka ajanga ashiba agi, US Labour Department-i itasen dak sendakba nung Google anema ken o ka benokogo. Parnoki ashiba agi Google ya government contractor ka lir aser temzüng kübok parnoki sorkari asüngdanga langzütsü nüngdaker.

Google pur ya itasen agütsüba ren nung tetsürtem bendanga amshiba dak sendakba nung aitsüogo.

US okadak ka nung Google-

i ashiba agi, Labour Department-i asüngdanga agütsütsü asoshi ghonda 500 aser sen \$100,000 indoktsü.

Labour Department kübok Office of Federal Contract Compliance Programs (OFCCP)-i Google dang asüngdangbaji, kecha telatetka makai kanga dang aika mesüra iba ajanga miim data tem temai adoktsü, ta Google-i ashi.

"Onoki OFCCP's audit tagidak atema parnoki meshibatem agütsütsü asoshi kanga meranga inyakogo aser taoba kümtem nung record meyrejang aika agütsüogo, koba nung compensation agütsübatema densema lir. Ajisaka OFCCP puri ashishiba karbo kecha telatetka makai kanga dang aika mesüra iba

ajanga miim data tem temai adokdaksütsü, anungji parnok dang iba osang magütsütsü ta shiogo," ta Google otongdar-i ashiba osang ajanga metetdaksü.

Otongdar-isa ashiba agi, parnoki asüngdangbatem rongnung Google nung mapa inyakertem indang jurila contract osangtem densema lir koba parnoki kümzüka ayutsü asoshi kanga meranger.

Labour Department-i ashishiba aitsüa Google-i ashiba agi, aprnoki asadanga nung itasen agütsüba yimya nung tetsür aser tebur na tsüingda kecha tebandang mali aser itasen agütsüba model ajanga bendanga amshitsü nungi nokdanger. Ajisaka mapa inyakertem ajakibo iba küli magizüker.

# Vodafone India-i plan tasen saya

**Kohima, May 27 (Agencies):** Vodafon prepaid customer tem atema Vodafon India-i tanü Vodafone Superday aser Vodafone Superweek plan sayaogo. Iba plan nung angati data dena tanenmakai local aser STD call sütettsü sentong densema lir.

Vodafone Superday amshiba ajanga customer temi anogo ka atema sen 19 yong Vodafon network tsüingda nung tanen makai local aser STD call sütettsü aser data-a 100 MB (4G handset atema dang lir) angutsü. Value tajungba atema customer temi VodafoneSuperweek amshitsü akok. Iba plan kübok customer temi sen 49 yong pack ka alia hopta ka atema tanen makai Vodafon network tsüingda nung

local aser SDT call tem angati agi sütettsü. Iba plan nung ano 250 MB data angutsü (4G handset atema dang lir). Iba dak alaka sen 89 yong Vodafone Superweek pack alia amshitetsü, kaoba nung tanga offer ajak den ano tanga network den minute 100 jembitetsü maongka agütsür.

"Customer tem nem network, service experience aser value tajungba agütsütsü asoshi onoki meranger. Pre paid customer tem nem jenjang temela nung plan balala 'Super' umbrella kübok Superday aser Superweek plan

amenokba asoshi kanga pelaa bilemer. Iba sentongtem ajanaga customer tem nem conection tajungba agütsütsü. Maneni item plan tem tanen makai alitetsü," ta Vodafone India, Director - Commercial, Sandeep Kataria-i ashi.

Superday aser Superweek pack tem company website, MyVodafone app aser retail outlet ajak nung angutsü.

Maneni customer temi item pack tem tanen makai amshiba ajanga anogo aser hopta ajakji super day aser super week kümdaktsütettsü.

PACK JENJANG YAMAI ALITSÜ:					
MRP	DEVICE	TYPE	DATA	VOICE	VALIDITY
19	4G	100MB**	Unlimited	Vodafone to Vodafone (Local + STD)	1day
49	4G	250MB**	Unlimited	Vodafone to Vodafone (Local + STD)	7days
89	4G	250MB**	Unlimited	Vodafone to Vodafone (Local + STD) + 100	

# Ariana Grande-i Charity Concert ka ayonga akatsü asoshi sentong lir

**New York, May 27 (Agencies):** Pop kentener Ariana Grande-i Hokolbarnü Manchester-i tanaben arua charity concert ka agütsütsü asoshoi nangzükogo.

Manchester nung lendong atalokba sülen Arishi küm 23 tain kenteneri la kentenba sentongtem thia Florida nung lar kidangi meyipa ao. Lai ashiba agi, Iba kentenba sentong ya Manchester dang temeim sayuba temaitsü ka asütsü.

Lendong nung densema

kibongtem nem teyari agütsütsü asoshi iba kentenba sentong ayongzüka akatsü, ta lai ashi. Ajisaka koba anogo nung akatsüar ajibo tang tashi mejangja.

"Iba amala lendong asoshi asenok telangzübaji; tanga mapang dang nungi tali longjemtsüba, kati ka yaritsüba, temeim sayutsüba aser tali agütsütsüba asütsüla," ta lai social media balala ajanga ashi.

"Iba tatalokba ajanga asenok tsüingda nung telem dang

madokdaksütsü. Tesempa nem asenok mekokdaksütsü," ta laisa ashi.

Grande-i ashiba agi, la kentenba sentong nung nüburtem wadang balala nungi 21,000-capacity Manchester Arena sünga adenshibaji music tashi lir.

"Music ya alima nung alir ajaki lemsateptetsü. Music ya asenok aneptsütsü, longjemdaksütsü aser peladaksütsü asoshi lir," ta lai maneni shisem.



**Cannes, May 27 : 70buba Cannes Film Festival nung 'D'apres une histoire vraie' film nung shilem agir Emmanuelle Seigner aser Eva Green na tangokba noksa nung angur.**

# Fingerprint Sensor dena Zen Admire Sense sen 5,999 yong sayaogo



**May 26, 2017 (Agencies):** India nung smarhphone yanglur Zen Mobile ajanga Admire Sense smartphone India nung sen jenjang 5,999 yong sayaogo. Iba phone nung tongtibangtiba feature temji fingerprint sensor, 4G VoLTE support, digital assistant app, asütsü.

Zen Admire Sense smarhphone ya India ajanga nung company partner shishilemar ket nungi angutsü.

Iba smarhphone ya sentsü ana nung angutsü; Blue aser Champagne Gold colour.

Zen Admire Sense nung

1.3GHz Quad Core chipset, 1GB RAM, 8 GB ROM keta lir aser iba den külemi phone memory 32GB tashi atsülangtetsü. Phone nung ano 5 inch FWVGA display keta lir aser battery tashi 2300 mAh alitsü.

Maneni Zen Admire Sense nung Android 6.0 Marshmallow keta lir. Phone nung sim ka dang amshitetsü.

Zen Admire Sense nung tejaklen aser tesülen camera naprongla 5-megapixel keta lir aser tesülen camera nung autofocus aser flash keta lir.



**Ranchi, May 27 : Bollywood actress Sunny Leone Honibarnü Ranchi-i arudang tangokba yangi angur.**

# Samsung anema ken o benok

**May 27, 2017 (Agencies):** Samsung Note 7 phone battery nung timtem adokba ajanga mepetmesü adokba samaa oya alidang, maneni Samsung phone tanga model tem nunga battery dak sendakba nung timtem adokba ajanga parnok anema ken o benokdar, ta osang ka ajanga metetdaksü.

Kasa timtem adokba phone tem rongnung; Galaxy S6, S7 Edge aser Note 5 nunger nung timtem adokba metetdaksüogo.

Iba ita tetenzüklen Massachusetts nungi Dale Holzworth-i ken o ka benoka liasü. Pai ashiba agi, Galaxy S7 Edge ka pai yaküm ali aser iba phone ya par jabaso takdang nung charge süa doktsür aliba mapang mi adok, ta osang ka ajanga Brehostibarnü metetdaksü.

Osang ajanga ashiba US kübok state asem nung ken o benokba ajanga sayuba agi, battery nung mi adokba aser timtem aliba Samsung company-i meteta liasü saka parnoki nüburtem dang

memetetdaksü.

Ano tanga ken o ka New York nungi Claire Gilligan-i benokba nung, tanga smarhphone tem nunga note 7 nung amshiba battery tem mesüka mesüra kasa inoka lir, ta metetdaksü.

Yaküm August ita Note 7 phone sayaba sülen ita ka tsüingda nung Galaxy Note 7 phone 112 nungi mi adoka liasü, aser iba ajanga phone sayar ita 5 tsüingda nung parnoki phone million 2.5 meyipa meshitsüsa aküm.

"Samsung-i nüburtem lendong-i idaktsütsüba phone yanglua ayoker," ta complaint ka nung shia lir.

Plaintiffs-i Samsung model tejen amshirtem nema note 7 nem agütsüba kasa refund aser exchange programme agütsütsü asoshi akhang.

Parnoki ashiba agi, Samsung-i Note 7-bo meyipa agi, saka tanga lendong aketba phone tem shishilembadak toktsü, kechiyong iba tebilemstü ya phone ka kicha nung dang masü tanga nunga lir.





New Delhi, May 27, 2017 : India nung mezüngbuba Ato kilonser, Pandit Jawaharlal Nehru sür küm 53 ajungba anogomung nung tanü, Honibarnü Shanti Van, New Delhi nung Tir, Pranab Mukherjee aser Congress Party Tir, Sonia Gandhi nati asür nem akhüm agüja sarasadem sentong nung adenba noksa nung angur.

### Tir candidate atema opposition den tama jembitsü: Amit Shah

**New Delhi, May 27 (Agencies):** Honibarnü BJP Tir, Amit Shah-i, BJP-i Tir candidate meshim dang opposition party tem tama ajurua jembitsü, ta metedaktsü. Opposition party temi longjemer Tir candidate ka shimtsü atema jembiba mapang ka nung BJP tongti leniri iba o ya jembio.

Tir candidate ka ajaki melungtepa shimtsü asoshi BJP-i opposition party tem den jembitsü asü? ta asüngdangba langzü dang Amit Shah-i, "Ajaki melungba' ta asüba ya o ya lenmang balala aika nung amshir. Onoki opposition party tem densema ajak den o lemtepsü," ta ashi.

BJP-i aniba NDA sorkari Hindutva nung ajemdaker Tir candidate ka shimra Congress,

Mamata Banerjee-i aniba TMC aser Left party temi secular opposition candidate ka shimtsü ta jembiba dak sendakba nung Shah-i, "Tang tashi nungbo onki tenüng ka danga shima mali. Onoki NDA teloktep party tem den tama jembitsü. Iba sülen ang onoki opposition party tem den jembitsü," ta ashi.

Yashi Congress Party Tir, Sonia Gandhi-i BJP nung madenba party tem senden ka ayonga liasü, aser iba senden nung opposition party temi, Tir election nung BJP den melungtepa Tir candidate ka shimtsü mekokra onoki telemteba ka agitsü, ta metedaktsüogo.

Yashi senden tembangba sülen opposition party temi sangdong ka ajanga, "Tir aser tatong Tir menden atema

election agitsü mapang ana nung lir. Teti agia sorkar tashi nung aliba party-i ketdangsa tenüngtem benoker. Tang tashi nung iba atema osang kecha mali. Party ajaki agizüktetsüsa candidate ka mesangdongra, onoki candidate ka shimtsü," ta sangdonga liasü.

Bihar Chief Minister, Nitish Kumar bo jelia sentong yanglua aliba ajanga iba senden nung medenteti liasü.

Tir election nung electoral college-i shilem agia Tir shimmer aser iba college nung vote ajak agi 11,04,546 lir, aser iba nungjagi BJP-i aniba NDA teloktep party tem vote ji 5,38,000 shi lir.

Tir election taküm July ita nung agitsü aser August ita nung tatong Tir election agitsü sentong lir.

### Nashi ayoktsü nokdangba ozüng pela agizüker: Maneka Gandhi

**New Delhi, May 27 (Agencies):** Tanü Union minister, Maneka Gandhi-i, shiruru ayokba market nung nashi ayokba mesüra aliba nokdangtsü atema ozüng tasen yangluba ajanga shiruru mesenmetui mamshitsü, ta ashi.

Shiruru temeten atema inyaker aser Union minister, Maneka-i tamalena nashi tepsetba nokdangtsü aser linük tesem ajunga nung 'zoo' nokdangtsü atema jembia aruogo.

"Atangji nung atalokbaji-aluyimertemi kiset shiruru ti mesüra teku abentsü gari ka nung shiruru 80 tashi abener, iba sülen shiruru ayokba market-ia itemji tepseter," ta Women & Child development Union minister, Maneka-i ashi.

"Aluyimertemi shirangba nashi mesüra tashidak aliba nashitem tepsettsü atema item market-i bener aoer. Tang ozüng tasen yangluba ajanga item ama tatalokbatem malitsü," ta laisa ashi.

Prevention of Cruelty to



Animals Act, 1960 kübok May 25, 2017 nü Ministry of Environment and Forests (MoEF)-i Prevention of Cruelty to Animals (Regulation of Livestock Markets) Rules, 2017 nung ajemdaker kiset shiruru ayokba market nungi nashi ayokba mesüra aliba nokdangogo.

Environment ministry osang ajanga ashiba agi, Maneka Gandhi'er telok, People for Animals-i taoba environment minister, Anil Madhav Dave dang iba atema inyaktsü mepishia liasü.



New Delhi, May 27, 2017: Honibarnü New Delhi, Raj Bhavan kima Ato kilonser, Narendra Modi-i Republic of Mauritius Ato kilonser, Pravind Kumar Jugnauth pela agizükba noksa nung angur. Kasa noksa nungsa Pravind Kumar kinüngtsü, Kobita Ramdane-a angur.

### Uttar Pradesh sorkari tensa tamajungba kümdaktsür: Rahul

**New Delhi, May 27 (Agencies):** Tanü Congress tatong Tir, Rahul Gandhi-i Uttar Pradesh, Saharanpur semdangtsü apusoa liasü, saka iba jila nung ketdangsertemi pa nokangba sülen pai Uttar Pradesh nung BJP sorkari tensa tamajungba kümdaktsür, ta aitsü.

Yamuna ayong apudong nung osangbenertem den jembidang Congress lenir Rahul-i, Shabbirpur yim atongtsü lia pa amenba gari police-i sota liasü, ta metedaktsü.

"Tang tensa apir ketdangsertemi kü dang iba tesem toktsür aotsü asüngdangogo, anungji ni meyipa aotsü. Kodang tensa süngjemdir yim semdangtsü atema kü nem temelaba agütsüta ta parnoki shiogo," ta paisa metedaktsü.

Tang Centre sorkari Uttar Pradesh, Saharanpur-i police 400 yoka lir.

Rahul den Congress lenir tain ana, Gulam Nabi Azad aser Raj Babbar nata liasü.

Rahul-isa, Yogi Adityanath-i aniba BJP sorkari state nung tsüzüng-ozüng tensa tamajungba kümdaktsür, ta aitsü.

"UP nung sorkari tensa maziükteti tamakok nguogo. Linük nung tashi malir ajak tsübuteper. Iba ama yimya nung linük yimsü masütsüüla," ta paisa ashi.

Ketdangsertemi Dalit nunger anema inyaker, ta Rahul-isa aitsü.

Tang rara adoka aliba Saharanpur nung Dalit nung kibong 180 tashi Buddhist tamangba yimsü dangi meyipogo.

"UP nung BJP sorkari Dalit nunger timtemdaktsüner, aser parnok anema nokdakertem nokdangtsü atema parnoki (BJP) tashi ajak amshia inyaker," ta paisa aitsü.

### Kashmir nung ghonda 24 tsüngda kiralongrar 10 tepsetogo

**Jammu, May 27 (Agencies):** Honibarnü Indian Army-i, Pakistan-i Kashmir nung kiralongra proktsü atema merangba mapa nokdangteta Hokolbar nungi tenzüka tanü tashi nung army temi kiralongrar 10 tepsetogo, ta metedaktsü.

"Temeshi ita- Ramzan atongtsü lia Pakistan aser Pakistan nunger agency temi state nung kiralongra mapa

inyaktsü merangba anema security sepaitemi mita aoba maparen nung takok nguogo," ta tanü Northern Command indang Defence otongdar kati metedaktsü.

Tesüiba ghona 24 tsüngda arrtsü alema aiter aser kiralongrar 10 tepsetogo, ta paisa metedaktsü.

Rampur sector nung aliba Line of Control (LoC) nung

tang security sepaitemi telungpur anema mita toudak lir, aser iba tesem nungji prangpong bener ozüng alema arrtsü adena aiter trok tepsetogo, ta pai ashi.

Ano tanga tatalokba ka nung Tral, South Kashmir nunga kiralongrar ana tepsetogo, ta paisa shisem.

Hokolbarnüa Uri sector kübok LoC nung kiralongrar ana tepseta liasü.



Srinagar (Jammu & Kashmir), May 27, 2017: Honibarnü Pulwama district, South Kashmir nung Army temi Hizbul Mujahideen tongti Commander, Sabzar Ahmad tepsetba sülen army tem ano tali kükümshiba noksa nung angur.

# United Nations-i Myanmar & Thailand aitsür

**Bangkok, May 27 (Agencies):** Myanmar aser Thailand nati Turkey-i nisung ka meyipa yokba atema United Nations (UN)-i aitsüogo.

Yaküm Turkey tir atsüngdoktsü merangba nung tai tonglokja alisang Fetullah Gulen den tesentaktep lir ta tai tongloktsüba atema nisungji Turkey nem agütsü.

Muhammet Furkan Sokmen ji Yangon nung aliba international school ka nung accountant inyaka liasü aser

tesüiba ita ishika tsüngda Southeast Asia nungi pa zünga nisung trokbuba Turkey-i meyipa yokogo, ta UN-i metetdaksü.

"Turkey nung parnok taküm lendongi aitsü ta UN Human Rights Office-i khuret süa bilemstür. Parnok dak human rights anema mapa inyaksü aser reshikangshitsü akok" ta UN indang Southeast Asia office-i sangdong ka nung ashi.

US nung sayutsingir Gulen-i July 2016 nung Turkey tir

Recep Tayyip atsüngdoktsü atema tasa atonga inyak ta Turkey-i aitsür.

Iba tatalokba sülen Turkey ketdangsertemi Gulen pusemertem anema mapa inyaksü tenzük aser parnoki nisung 100,000 dak tema apu mesüra mapa nungi anentsüogo.

Muhammet ya mezüng May 24, 2017 nü Yangon airport nung par kibong den lia apu.

Idak nungjagi pa Thailand-i anir ao aser ghonda 24 shi ayuba sülen Hokolbarnü

Turkey-i yok.

Yangon nung Horizon International School indang kongsang asem shibangtsüba sülen anogo ishika lir Muhammet apu. Pa iba school nung accountant inyaka liasü.

Turkey nung sorkar atsüngdoktsü merangba sülen police-i Horizon International School-i kiralongrar teloktem den tesentaktep lir ta onük nung ajemdaker bushisüngdang ka tenzük, ta Myanmar magazine Frontier-i metetdaksü.

# al-Sisi-i kiralongrartem anema raratsü nangzük



**Minya, May 27 (Agencies):** Khristan tepsetba telungpurtem training agiba teseptem Egypt tayimtsütem ajanga Libya nung makogo.

Egypt Tir, Abdel Fattah al-Sisi-i ashiba agi, pai kiralongrar teseptem amaktsü atema tetuyuba agütsü aser kiralongraba nung yaritepa linüktem merenshitsü, ta paisa shisem.

Kiralongrartemi Coptic Christian tem telok ka amakdang nisung 29 tepsetba aser 24 yirutsüba sülen Libya kübok Derna tesem anasa tesem 6 amak, ta Egypt mitkar osang ka ka ajanga metetdaksü.

"Kiralongrartemi inyakba mapaji odangbo meyutsütsü. Onoki kiralongrar training agiba teseptem amaktsü" ta Sisi-i ashi.

"Egypt anema mapa inyakertem training agiba tesemtem maneni amaktsü. Egypt nung süaka mesüra tanga linük nung süaka, onoki amaktsü" ta paisa shisem.

# Philippinesnung kiralongrartemamak

**Manila, May 27 (Agencies):** Philippine security force temi Honibarnü Marawi nung bomb amshia makogo. Iba yimti nung parnoki Islamist kiralongrartem den anogo pungbuba rarayonga arur.

Tir Rodrigo Duterte-i iba tesem nung 'martial law' agütsüogo aser tang tashi nung nisung 48 taküm samaogo.

Islamic State (IS) teloki local caliphate ka tentetsü atema mapa inyakba anema onoki rarar ta Duterte-i ashi.

"Onoki kiralongrar telok samatsütsü atema tayimtsütem amshia amaker. Onoki parnoki alidak metetogo" ta Army otongdar Lieutenant Colonel Joar Herrera-i osangbener dang ashi.

Catholic nunger teimba sü aliba Philippines linük nung Marawi ya Muslim nunger nütsüng teimba aliba yimti ka lir. Yimti nung rara adokba idakji alir nisung 200,000 shi tangalen oa jenoka lir.

Philippines nung IS tanishisang ta temulung melemi bilemer Isnilon Hapilon aputsü merangba sülen Mongulbarnü Marawi nung telungpurtemi yimdong nung ozüng alema mapa inyaksü tenzük.

Telungpurtem jagi IS wakotem sendak aser tenlaki ka nungi putir ka den tamanger 14 tashi pur ao. Parnokisa kiojentem nung mi senokja rongdoktsü.

Rara nung sepai 13 den police 2 aser kiralongrar 31 tashi süogo, ta ketdangsertemi ashi.

# GST atema renema liang

## July 1, 2017

nungi tenzuka GST tiptema mapa kuma tenzuka aotsü atema tesüiba ita 6 tsüngda Sorkari maparen inyaksü tenzükogo.

Tang tashi nung inyaktetbatema

- GST Acts & Rules renemogo aser yimjak nung metetdaksüogo.
- State aika nung SGST Act agizükogo
- Goods and services nung GST Rates sangdongogo
- Tang saru tagütsüdakpur belenogo. Tenüng magütsü aliba saru menokertem asoshi, June 1-15, 2017 tashi Window for Migration lapoktsü.
- Linük ajungalen State VAT ketdangsertem aser trade & industry chambers den GST Workshops 3500 den teimba agiogo.
- GST nung Central aser State Tax officials 50000 den tem training agütsüogo.
- NACEN-i telok 20 nem trade & industry aser sendaktepa aliba züngsemtem training agütsütsü atema temelaba agütsüogo
- www.cbec.gov.in nung GST ozüng aser teinyaktsütem, GST indang tasüngdangbatem, GST- Concept and Status, Step-by-step Migration Guide amala angütsü

dayp 15502/13/0012/1718

Follow us on :  
cbec\_india

www.cbec.gov.in

Directorate General of Taxpayer Services

**CENTRAL BOARD OF EXCISE & CUSTOMS**

Kodang saru agütsüdir, linük ka yangerteter

## Q. Nagaland nung senzuba taxi aser auto rickshaw ajak ya Naga nungertemi dang anitsula ta ozung kuma latet nunga koma sula ?

(Maneni tapak 7 nungi...)

Aji kangasa jungla saka tama tsumarji Nagaland nungi ainshi ka mesura kodanga makoktsu aser talisa Dimapur ama ka nungbo ibaji tamakoktsu ka ama dang nibo bilemer no.

-SMS

Aji kanga dang tajung aser tapet ka sula saka asen Naga lima nung iba ozungji ka agutsu ka asu nunga kodanga makoktsu ama nibo bilemer ati. Kechiba sura dokani aodanga tsumar dangi dang tama oa shishir nung, tetezui tsumar jagibo tanu sempaka adok nung yangji kecha tulukabo makoktsu. Iba jagi tsumar tekulakji aseni memetet. Kodang Naga nung dokani odir alinura aliang malinura tali ta shia alinung kodaser asen Naga nung dangi oa alitsuba ta aikati bilemer nung. Iba isapji taxi aser auto rickshaw asen Naga nung dang anitsu ta ozung yanglutsu ta asubajibo kodanga makoktsu ta dang nibo bilemer ati aser aji shitakba ta danga no.

-SMS

Ayatai ma ni Nagaland nung ozung agi alen yonga khen dang asutsu. Anungji kecha mebulshi dang lidijai ta danga no.

-SMS

Kanga ajungtsu saka noklangka (Rs.100) alangba nung ana memeshitsula aser taxi, auto dang masu saka tekolak ko mejeper (hair cut) ya koda asen Naga nung sen idakji timba aoe. Asen Naga nung ajaki headmaster dang suner tanidaker mesunerji, ozung kechi yangludi yangluaka majungtsu. Tangar lima kodanga madoktsu, pei oshi mejembitet mesura memeim tashi majungtsu. (Lanurtem govt job masu daily income inyaksu meranga)

-SMS

Tesungmangtsu ka sula na tamasa odang tsumarji ajak aridoker dang inyaksuba dang bilema dang atadi ni? Ta ser dang iba mapaji inyakdi arung ta dang ayongzucker ati nibo.

-SMS

Nagaland nung tang tashi nung zunger mapa mongui alir meyi metsu tema alirtemji. Sorkar mapa kechia agibo mepiritsutetsu. Anungji shishilembaba aser yamala mesukba maparen balala nung pa mesura la tazungba kuli kakat repranger pei yari sorkari loan agutsu inyadaksutsula. Taxi, auto alia anitsuja temelaba agutsu nung jungtsu ta ku tebilemba shidanger.

-SMS

Nagaland nung taxi aser auto rickshaw ya asen Naga nungertemi aninungbo sen 10/20 talila tur meshir, anungji tsumari aniba tajungba.

-SMS

"Mapa medenra tamangji tasu". Ozungji dang yakta yanglutet nungbo kanga tajung asutsu. Auto aser taxi dang masu saka shishilembaba tsutsulena retailer tembo Naga nung dang asutsula. Khenbo timtemtsu akok saka tayokeri/taniri aser taliri/tameneri pei temeden meteta shishilembatepra ajak ajangzuktus.

-SMS

Ajia kanga junger saka asen Naga nungertemi azumesen teimba dang nung kodaser yamaji inyaksutsu. Ozung yangluang kodanga makoktsu ta dangano.

-SMS



### CORNERSTONE COLLEGE (ARTS)

(Affiliated to Nagaland University)

### CORNERSTONE HIGHER SECONDARY SCHOOL (ARTS & COMMERCE)

DUNCAN BASTI - DIMAPUR - 787112 NAGALAND

#### ADMISSION DETAILS FOR BACHELOR OF ARTS & CLASS - XI (ARTS & COMMERCE)

**FACILITIES:**

- Experienced Faculty
- Well equipped Computer Lab with internet facility
- Literary with e-book facility
- Basketball and Volleyball courts
- Indoor Stadium for Badminton & Table Tennis
- Limited Hostel seats available
- Canteen

**SPECIAL FEATURE:**

- Vocational Courses on skill development for students on different traits
- Spiritual and Academic Counseling



**SUBJECTS OFFERED: (GENERAL & HONOURS)**

ENGLISH / EDUCATION  
HISTORY / SOCIOLOGY  
ECONOMICS / POLITICAL SCIENCE

FOR MORE DETAILS CONTACT: (0362) 264141 / (0362) 264142 / (0362) 264143

**ADMISSION FORMS AVAILABLE AT:**

Cornerstone Hr. Sec. School  
Cornerstone College  
Duncan Basti, Circular Road  
Dimapur - Nagaland

**ADMISSION STARTS SOON AFTER THE HSLC AND HSSLC RESULTS**

## PELABA LEMSATEPER

"A Testimony of God's Grace Defying Human Possibilities..."

Late. Mr. L. Mar Ozukum (Mongsenyimti)

5th Mile, Dimapur



Aso : 06/03/1948

Asu : 17/05/2017

Onoki kanga dang meimba obala aser kinungbo asuba mapang ozu asoshi aria bilemstur aser temeim sayur kija ajak dang 'kanga pelar' ta temulung taroktiba nungi metetdaksur. Medemertem agi kibongtemi ozu den sarasadem, nubo, osettsuset aser senotsu aser yaritepba atema kangasa pelar. Nenoki ozu den asuku lemsatepba pelashishia agizucker aser ozui nur mapa tajung kodanga mamatsu. Tsunglanglen tetshia alirtem dang ozui pelaba shisemer.

- East Dimapur Ao Baptist Arogo
- Unity Village Ao Baptist Arogo
- Aoyimti Baptist Arogo
- Sumi Baptist Church Unity Village
- Chakhesang Baptist Church Unity Village
- International Evangelistic Fellowship (IEF), Dimapur Wing
- Dimapur Mongsenyimti Senso Telongjem
- Dimapur Langpangkong Senso Telongjem
- Dimapur Aoli Ozukum Telongjem
- Unity Village Council
- Unity Village Ao SensoTelongjem
- Tsukjemtmsu Zunga Telongjem
- D.Khel Telongjem Mongsenyimti
- Medemer Telongjem Mongsenyimti
- Mongsenyimti Nokojungba Tsur Dimapur Unit
- Sentep Luim Society Dimapur
- Sacred Heart English School, 5th Mile
- Vision Home Higher Secondary School, Diphupar

-Temeim Kinungtsu, Jalatem aser Semchirtem

## Nagaland Assembly anentsu ... (TAPAK 1 NUNGI...)

Yimten tebilemstus atema Idangji, Chief Minister Dr olemtepba teloktemi tanungba Shurhodelie Liezietsu-i "iba teloktem olemtep nung tebilemstus ta koktettsu kanga adentsu atema jaoktsula. tasak aser Naga telungpur Yamaji inyak nungdang telok ka den dang jembiba tatembang telemtetba ka agibo, ajaki agizuktusa aser agitettsu, ta paisa shisem. mulungtsusa telemtetba ka magitettsu" ta ashi.

Sorkar anenba sulen Iba jagi state sorkari Naga telemtetba ka agitsu ta masu Iba jagi state sorkari Naga saka telemtetba ka agiba yimten telok ajak den soren ang assembly anentsu ta ajurutepe sendentem amener sorkari Naga nung dang aser telemtetba tajung ka j a n g j a j a n g j a agitsu atema parnok tsungda metetdaksutsula, ta Dr T M angatetteptsu mepishia arur, Lotha-isa ashi. ta Dr Shurhodelie-isa shisem.

### CENTRAL HINDI DIRECTORATE

#### DEPARTMENT OF CORRESPONDENCE COURSES

##### PLEASE NOTE

##### LEARN HINDI BY POST (ADMISSION NOTICE)

Request for supply of separate application form will not be entertained. Please send application on plain paper providing information on the points given.

Applications are invited from Non-Hindi speaking Indians, Foreigners and NRI's for admission to the following Hindi Correspondence Courses.

- Certificate Course in Hindi (Preliminary Course/Middle Level) and Diploma Course in Hindi (Subsequent to Certificate Course/Secondary Level in English/Tamil/Malayalam/Bangla Media).
- Advance Diploma Course in Hindi (Sr. Secondary Level) in Hindi Medium only.

##### (A) ELIGIBILITY

**Certificate Course in Hindi** - is opened for the beginners who do not have any/very little knowledge of Hindi. Indians whose mother tongue is not Hindi and who have attained the minimum age of **10 years** as on **01/07/2017** or foreigners/Indian Nationals/Settlers residing abroad the minimum age is **10 years** as on **01/07/2017** irrespective of their mother tongue.

- Diploma Course** is open for those who possess basic knowledge of Hindi. Indians whose mother tongue is not Hindi and who have attained the minimum age of **10 years** as on **01.07.2017** or foreigners/Indians Nationals/Settlers residing abroad the minimum age is **10 years** as on **01/07/2017** irrespective of their mother tongue.
- Advance Diploma Course** is for those who have sufficient knowledge of Hindi and is open to all Indians and Foreigners residing in India or abroad whose mother tongue is not Hindi. Minimum age limit for admission as on **01/07/2017** is **17 years**.

##### (B) Fees Structure

Course	Fee in Indian Currency	Foreign Currency	Payable to
Certificate/Diploma	Rs.50/-	\$ 50 or equivalent	Director, Central Hindi Directorate
Advance Diploma	Rs.200/-	\$ 200 or equivalent	Director, Central Hindi Directorate

Note: Fee can be remitted by IPO or Bank Draft Money Order and Cheques are not acceptable.

The closing date for submission of filled up application forms along with fee is **31/07/2017**.

##### Application Form

##### Certificate/Diploma/ Advance Diploma

- Name of the Course (Indicate one by (✓) Mark) : Certificate  Diploma  Advance Diploma
- Medium of Instruction opted (Indicate one by (✓) Mark) : English  Tamil  Malayalam  Bangla   
**Advance Diploma is available in Hindi medium only**
- Name of the Applicant (In Capital Letters) : Shri/Smt/ Kum./Ms. \_\_\_\_\_
- Category (Indicate one by (✓) Mark) : General  SC  ST  OBC  PH
- Date of Birth : \_\_\_\_\_
- Father's Name : \_\_\_\_\_
- Nationality : \_\_\_\_\_
- Sex : \_\_\_\_\_
- Mother Tongue : \_\_\_\_\_
- Academic Qualifications : \_\_\_\_\_
- Knowledge of Hindi (Indicate one by (✓) Mark) : Basic/Sufficient/ Appeared/Passed Certificate Course  Appeared/Passed Diploma Course
- Particulars of Fees (Number of IPO/Bank Draft/Date & Amount) : \_\_\_\_\_
- Postal Address with Pin Code : \_\_\_\_\_  
**(Write in CAPITAL LETTERS ONLY)**
- Contact No & e-mail Id : \_\_\_\_\_

I undertake that I have read the instructions carefully and fully abide by them.

Dated: \_\_\_\_\_

(Signature of the Applicant)  
(Name in Capital letters)

Application may be addressed to :- **The Assistant Director (Bureau Head)  
Department of Correspondence Courses  
Central Hindi Directorate,  
West Block-7, R.K.Puram, New Delhi-110066**

- Note :
- Admission will be given on First-cum-First basis.
  - Central Hindi Directorate has not authorized any Institution/Agency/Person to run the above Courses.
  - Students who have appeared in Certificate/Diploma Course Examination can also apply for the higher course.
  - You are not allowed to seek admission simultaneously in two courses conducted by Central Hindi Directorate.
  - Application received after the closing date will not be entertained in any circumstances and no communication will be entertained in this regard.



Eugene, May 27:-  
4 3 b u b a  
P r e f o n t a i n e  
C l a s s i c , H a y w a r d  
F i e l d n u n g t e t s ü  
s t e e p l e c h a s e  
a s e m t e p b a n u n g  
C e l l i p h i n e C h e s p o l  
( K E N ) t a k o k n g u r  
p e l a b a n o k s a  
n u n g a n g u r .

### South Korea pur Sudirman Cup final-i iogo

Gold Coast, May 27 (Agencies): Sudirman Cup asemen tashi koker aliba telok South Korea-i Honibarnü 3-0 agi Thailand madak takok ngua final-i iogo.

South Korean pur Deobarnü final nung China mesüra Japan den asayatsü.

Sung Ji Hyun-i asaya pezübuba nung Ratchanok Intanon 21-13, 21-17 agi koka par telok asoshi final nung asayatsü atema maongka agütsü.

Dechapol Puavaranukroh aser Sapsiree Taerattanachai nati tarep temeyoktep asaya nung 21-16, 21-12 agi Choi Solgyu aser Chae Yoo Jung ya minute 41 nung koka Thai nung nem mezüngbuba takok agütsü.

Iba sülen tebur kicha asaya

nung Son Wan Ho-i kanga junga asayaa Suppanyu Avihingsanon 18-21, 21-10, 21-17 agi akok.

"Iba hopta asayaba ajanga kü tetsüng kanga taret liasü. Ni mezüngbuba asaya nung kanga belem saka iba asaya ya akoktsüla ta ni meteta liasü. Ni pa pongubenbo kokogo saka February nung asayadango deciding nunga ni akok. Tanü asaya ya semi-final liasü aser ni kanga pressure nung liasü. Pa kanga dang attacking asayar ka lir anungji ni defence akangtsü aser aibelen kangabo masütsü nüngdaka liasü," ta Son-i ashi.

Tebur tarep asaya nung Choi Solgyu aser Seo Seung Jae na ya Dechapol Puavaranukroh aser Bodin Isara an atema kanga tashi

tait liasü aser Korea nung terep asayar-i 21-13, 21-16 agi akok.

Ibasülen Thai puriba asayamong nung maneni shilem agütsü asoshi Ratchanok Intanon kaboma nung liasü, saka lai Sung mokokteti parnok iba asayamong nungi tsükadok.

"Onoki otsü tasen ka yangluogo. Taküm onok team ya tashimait ta züngshia liasü. Asayamong atongtsü mapang nung tebur tarep asayar tem team toktsü. Onoki quarter final atongtsü asoshi nükjidong ayu. Onok kanga pelar. Taoba küm ana tashi onok kanga junga asayaa arudar. Onok joko 2020 Tokyo Olympic atema asayar tasen anitetsü asoshi renemshidar," ta South Korean head coach Kang Kyung Jin-i ashi.

### Silva Manchester City nungi asayatsü

May 27, 2017 (Agencies): Portugal nung playmaker Bernardo Silva French champions Monaco nungi Manchester City den July 1 nü nungi tenzuka adentsü, ta English Premier League club ajanga Hokolbarnü metetdaksü.

2017/18 atema Silva ya nungtugu asayar rongnungi Manchester City atema manager Pep Guardiola-i mezüngbuba aliba asütsü.


City puri pa aliba sen jenjang mesüra pa iba club nung küm kwi atema asayatsü ali item osang tejangja magütsü, saka osang ka ajanga ashiba agi, arishi küm 22 tain asayar ya million £43 million (\$55 million, 49 million euros) shi agi ali südi.

Silva alitsü asoshi Manchester United pura tejangraba liasü saka pai city nungi asayatsü asoshi shimtet.

"Alima nung club tajungtiba ka nung asayatsü asoshi maongka anguba atema ni kanga pelar," ta Silva-i City website nung ashi.

"Ni iba telok nung shilem ka asütsü asoshi maongka anguba atema kanga pelar aser team pur nükjidong tongtetsü asoshi ni akokba tashi tajungtiba asayatsü merangtsü.

"Guardiola kübok angazütsü asoshi shibai ma ta ashitsü. Pa alima nung coach



Bernardo Silva (File)

tem rong nung tajungtiba mesüra tajungtiba rongnung ka lir. Pai Barcelona aser Bayern Munich nung inyakba asenok ajaki meteta lir, aser pai iba club nunga takok marok aika abentsü ta imlar. Pa den külemi inyaktsü asoshi maongka anguba atema kanga pelar," ta paisa ashi.

Premier League champions Chelsea kübok parnok tasembuba jenjang nung tembangba sülen Guardiola-i tawa ang club nungi tejen asayar winger Jesus Navas aser defender Gael Clichy na doktsüogo.

Navas aser Clichy na den külemi goalkeeper Willy Caballero aser Bacary Sagna na den doktsüogo. Parnok den külemi Pablo Zabaleta-a doktsütsü liasü, shiba West Ham nung Hokolbranü denogo.

### Nagaland Assembly-i GST Bill agizükogo... (TAPAK 1 NUNGI...)

Olemtepdang DAN Chairman aser Financial Advisor to Chief Minister, MLA TR Zeliang-ia 'technology checking' ajanga ochimashi aser ozüng alema sen amshiba samatsütsü tayongzükbaga agütsü.

Taoba mapa sorkar senpongi saru aibaji noklang nung shilem 30-40 shi ka liasü saka GST kübok saru 100% aittsü. GST tenzükba ajanga 'total tax payable' ji shilem

28 ajema akümtsü, kechiyong tang saru 32% agia aliba nungi toll tax, excise tax, mesüra entry tax amala agientsü. Iba ya ajanga talirtem tajangzükbaga angutsü, ta TR Zeliang-isa shisem.

GST kübok küm nung sen lakh 10 aser tema angurtem dak aittsü, anungji shishilembar tilatem aser talisa yimtsüng amala nung aliba shishilembarntemi arentaka meblemtsüla, ta paisa metetdaksü.

GST atema olemtepdang Housing Parliamentary Secretary Levi Rengma aser Tourism Parliamentary Secretary C Apok Jamir natia jembia.

MLA temisa Naga nung dang GST mapa küma aotsü atema mulunga agizüktsü mepishia metetdaksü aser parnokisa ashiba agi iba ajanga state renloktsü aser tejakleni aotsü.

### Kashmir nung Wani melenzüker... (TAPAK 1 NUNGI...)

Bhat apur nem mesüra pa indang osang tejangja sangoktsür nem sen lakh 10 senpet agütsütsü ta India-i sangdonga lir.

Yaküm Wani tepsetba sülen Hizbul Mujahideen-i Kashmir commander tasen inyaktsü atema Mehmood Gaznavi shimer ta metetdaksü aser nisung aikati ibaji Bhat indang tenüng tanga ka liasü ta bilem.

Tanep Bhat tepsetba osang angazükba sülen Pulwama, Shopian, Anantnag, Sopore,

Kupwara aser Srinagar nung nisungtemi lungkak aittsü tenzük. Tesem aika nung lungkak aitertemi sepaitem dak lung agi ona rara aser sepaitemi lijak aser injang amshia azüok.

Tral anasa sepaitem aser telungpurtem tsüngda khatepdang civilian ka khaset aser asem yiru, ta Pulwama district ketdangser katia metetdaksü.

Bhat tepsetba ajanga Hizbul Mujahideen-i tetsükdaksü tulu angutsü kechiyong hopta ishika

tejaklen tongti commander Zakir Musa-i telok den tesentaktep pilaogo, ta police ketdangser kati ashi.

"Hizbul Mujahideen-i Kashmir nung telok ketdangtsütsü atema Pakistan nungi nisung ka yoktsüsa akümtsü saka ibaji tamakoktsü" ta paisa shisem.

Hizbul Mujahideen ya India, United States aser European Union temi kiralongrar telok ka ta züngoka lir. Iba telok nung tanishisangji Syed Salah-ud-din lir aser pa Pakistan-occupied Kashmir (PoK) nung alir.

### Onok-Nenoki Ibuba Open Penalty Shoot-out kokogo



Dimapur, May 27 (TYO): Chumukedima Ao Students' Union-i ayongzüka May 27 nü 1st N.A.P football ground nung mezüngbuba Open Penalty Shoot-out Tournament kaogo.

Asayamong lapokba sentong Tamsunaro lenisüba kübok aka. Sentong nung temoatsü meshia Police Baptist Church C.E.D Tialila Imchen-i sarasadem iba sülen sentong nung tetushi tesemdang Chumukedima Village Council Chairman Razouvotuo Chatsu-i tajungshi o tatsüka jembia.

Asayamong nung telok ajak agi, parnok 32 liasü. Asayar rongnungi tambusangji arishi küm 64 aser tanubusangji ahishiküm 13 ta liasü. Final asaya Onok-nenok aser Black Hornet-A na asaya aser Onok-nenok teloki 5-4 agi akok. Asayamong nung best goal keeper Black Hornet-A telok nungi Chingmak nem agütsü aser iba sempet ya G-sports Chumukedima-i agütsü.

Takoker -Onok-Nenok Runners-up -Black Hornet A Winner: Centre circle shot-Salenthung

### Ao Laishirtemi yimten aser ... (TAPAK 1 NUNGI...)

Kasa sentep nung tanabuba o jembir, Dr. P. Kilemsunglai 'Arogo inyakyim nung Ochi' indang jembidang, "Arogo nung ochi kulisir adoktsü asoshi Arogo nung lenir shimba nung teshisadangtsü lir, arogo nung sentongtem agidang Khrista tiyongtsü sür agitsüla, nüngdakba pur aser tepetzük tia nung aliba arogopur asoshi lenji oa lenmang kar nungbo yaritsüla, tenla tenji zülür alemba nung tajangzükbaga aser tamajung anaprongla dena lir, anungji iba ya khen repringshitsüla, arogopur rongnung ita sen sarusaji balala saruba ya shisadangtsüla, arogo tenzükker nem taa shitak agütsütsüla, arogo nung tetsürtemi tongti shilem agitsüla, pastor ajanga theology azüngi aortem asoshi kuli shitak agütsütsüla, arogoi clean

election, human trafficking aser prostitution onüktem nung tongti shilem agia inyaktsüla," ta tereprangtetba aser rongdak nüngdak teinyaktsü tongtibang kar lemsatep.

Kasa anogo aonung sentep sentong nung "manokshiba tamang" onük nung ajemdaker Rev. O. Alem-i jembidang, "Tsüngrem tenzüktsü asoshi Tsüngremi ajaba meteta Tsüngrem O azüngba laishirtem tenzükba mapa nung takok angubaji asenok masü saka Khrista ajanga lir," ta nenshia metetdaksü.

"Naga lima yanglutsü asoshi Arogo medeni yanglutsü makoktsü, arogo Otsü mejembia Naga lima otsü jembitsü makok itemji angateta, arogo nem

Tsüngremi tashi ajak agüja alinungji Tsüngrem tenzükba mapa nung tasü itta inyaktsüla," ta shia liasü. "Matt. 7:21-23 nung ashi ama, Tsüngremi tatem anogo nung asenok shibar memetet ta mashitsüsa atentena aser pelaseta Tsüngrem tenzüktsüla," ta paisa Laishirtem ayongzükbaga.

Kasa aonung lanurtem nem Tsüngremi agütsüba sempet tapu balala ajanga Tsüngremi temeim kuli süa liasü.

Iba mungdang ya Deobar aonung tembangtsü. Iba tatembangba anogo mezüng sentep sentong nung SBC Principal, Wb. Tsüknung aser tesüsaba sentong nung ABAM Executive Secretary, Rev. Dr. Mar Atsongchanger nati Tsüngrem o jembitsü.

**BIEMDANGANG**  
"Tebilemstü melira takok angudak malitsü ."